

চিত্ত-মুকুর ।

পদ্য গ্রন্থ ।

কলিকাতা

৪৪ নং, বেণিয়াটোলা লেন

রায়যন্ত্রে

শ্রী আশুতোষ ঘোষাল কর্তৃক মুদ্রিত ।

সন ১২৮৫ ।

সূচীপত্র ।

বিষয়	পৃষ্ঠাঙ্ক
কলঙ্কী জয়চন্দ্র...	১
চিতা শয্যা ...	২৩
অভাগিনী ...	৩০
উদাসীন ...	৩৪
সলিল প্রতিমা ...	৪১
কে গাহিল ...	৪৪
দুঃখিনী রমণী ...	৪৮
পুন্দরের দৈত্য ...	৬১
অকস্মাৎ সে তারাটি ডুবিল কোথায়	৬৯
সুন্দর হইয়ে কেন হইল চপল ...	৭৫
আশা তৃষ্ণা প্রণেশ্বর কর বিনর্জ্জন	৮০
অকাল কোকিল ...	৮৭
হৃদয়ে হৃদয়ে যদি সম্ভবে উত্তর ...	৯১
সমর সাহীর বিদায় ...	৯৮
প্রেম-প্রপাত ...	১১১
সায়ফ চিন্তা ...	১১৫

বিষয়	পৃষ্ঠাঙ্ক ।
একখানি চিত্র-পট দর্শনে	... ১২১
নিশীথ বিলাপ	... ১২৬
স্বপ্ন প্রতিমা	... ১২৮
হিতকরী সভার সাম্ব্যৎসরিক সম্মিলন	
উপলক্ষে ১৩৩
পুষ্পমালা উপহার পাইয়া ১৩৬
আমিত উন্মাদ নই, উন্মাদ জগৎ	১৩৮
কুলীন কামিনী ১৪১

উৎসর্গ-পত্র ।


পূজ্যপাদ শ্রীযুক্ত বাবু হেমচন্দ্র
বন্দ্যোপাধ্যায় অগ্রজ মহাশয় ।

আর্য্য !

সংসারে যদি কাহাকেও দেবতুল্য ভাবিয়া থাকি তবে সে আপনি—যদি সদগুণের পক্ষপাতী হইয়া কাহাকেও অবনত হৃদয়ে পূজা করিতে ইচ্ছা হইয়া থাকে সেও আপনি—উন্নত প্রকৃতি দেখিয়া যদি কাহারো পদাবনত হইতে ইচ্ছা হইয়া থাকে সেও আপনি । প্রথমত, অগ্রজ বলিয়া চিত্ত-মুকুর আপনারই অর্চনার উপকরণ ; দ্বিতীয়ত, যে মহাত্মা এত সদগুণে বিভূষিত তিনিও উপাস্য । ভক্তিপূর্ণ হৃদয়ে চিত্ত-মুকুর আপনাকেই অর্পণ করিলাম ; কনিষ্ঠ বলিয়া আমার প্রতি যে রূপ স্নেহদৃষ্টি আছে চিত্তমুকুরের প্রতি সেই স্নেহদৃষ্টি থাকিলে আর একটা নূতন স্থখে স্থখী হইব ।

আপনার স্নেহের

শ্রীঃ—



বিজ্ঞাপন।

সকল গ্রন্থেরি এক এক উদ্দেশ্য আছে ; হয় শিক্ষা, নয় আমোদ। কাব্যের যে উদ্দেশ্য শিক্ষা সে অতি মহৎ সন্দেহ নাই, কিন্তু কাব্য মাত্রেরি যে শিক্ষক হইতে হইবে তাহাও নহে অনেকানেক প্রসিদ্ধ কাব্যের উদ্দেশ্যও আমোদ। যাহারা শিক্ষকতার জন্য কাব্য লিখেন যশঃ তাঁহাদের গৌন উদ্দেশ্য যাহারা সাধারণ বা, নিজের আমোদের জন্য কাব্য লিখেন আমোদই তাঁহাদের মুখ্য উদ্দেশ্য। চিত্তমুকুর লেখকের ন্যায় সামান্য ব্যক্তির পক্ষে শিক্ষকতা বা যশঃ-প্রত্যাশা দুই আশা-তীত। চিত্তমুকুরের উদ্দেশ্য ইহার নামেই স্পষ্ট প্রকটিত রহিয়াছে। কবিতা রচনায় গ্রন্থকারের আশৈশব আমোদ বাল্যাবস্থা হইতেই বনের ফুল, জলের ঢেউ, আকাশের দামিনী ইত্যাদি বস্তু দেখিয়া গ্রন্থকারের হৃদয় নাচিয়া উঠিত এবং অবসর পাইলেই সেই হৃদয় উচ্ছাস গুলি, স্নধু তাহাই কেন স্নেহ, আশা, নৈরাশ্য, ক্ষোভ ও ভয় প্রভৃতি হৃদয়ের কোমল প্রবৃত্তি গুলি কবিতায় প্রকটিত করিয়া নিজেই আমোদ অনুভব করিত।

চিত্তমুকুরের অধিকাংশ কবিতাই হয় বন্ধুবর্গের অনুরোধে নয় গ্রন্থকারের নিজের আমোদের জন্য লিখিত হয় ; এবং ইহার অনেক গুলি কবিতা বন্ধুবর্গের অনুরোধে ইতি পূর্বে এডুকেশন গেজেট ও বান্ধব পত্রিকায় প্রকাশিত হইয়াছিল।

পুস্তকাকারে প্রকাশ করিবার উদ্দেশ্যে ইহার কোন কবিতাই লিখিত হয় নাই। বন্ধুবর্গের প্রশংসাবাদে—এ প্রশংসা তাঁহাদের স্নেহবশতই হউক কিম্বা উৎসাহ দিবার জন্যই হউক—গ্রন্থকার সাধারণ সমীপে কবিতা গুলি প্রকাশ করিতে সাহসী হইল। যখন সাধারণের নিকট গ্রন্থকার বলিয়া পরিচয় দিতে হইতেছে তখন যশের কথাটি সর্বাগ্রে স্মরণ করিতে হইবে। কিন্তু বঙ্গীয় কবির যশ বড় দুর্লভ, বিশেষ যে সাহিত্যক্ষেত্রে ভারতচন্দ্র ও মধু সূদন দত্ত প্রভৃতি মহাত্মারা কবিতার কুহক ছড়াইয়া গিয়াছেন, সে সাহিত্য ক্ষেত্রে এ গ্রন্থকারের যশের আশা কতটুকু! পাছে সমালোচক দিগের লেখনি প্রহারে চিরকলঙ্কিত হইতে হয় গ্রন্থকারের সেইটিই প্রধান ভয়, কিন্তু লোকে যাহাই বলুক চিত্তের স্বাভাবিক গতি হৃদমণীয়া।

কেহ যদি গ্রন্থকারকে জিজ্ঞাসা করেন যে “পাঠক দিগকে এ নরক যন্ত্রনা দেওয়া কেন,” গ্রন্থকার তাঁহাকে এই উত্তর করিবে যে ইহা তাহার অনিচ্ছাকৃত অপরাধ। চিত্রমুকুর সম্বন্ধে গ্রন্থকারের আর অধিক বক্তব্য নাই কেবল এই পর্য্যন্ত যে চিত্রমুকুর তাহার প্রথম উদ্যম।

উপসংহার কালে শ্রদ্ধাস্পদ বাঙ্কব সম্পাদক বাবু কালী প্রসন্ন ঘোষ ও প্রসিদ্ধ কবি বাবু নবীন চন্দ্র সেনকে ধন্যবাদ না দিলে অকৃতজ্ঞ হইতে হয়। চিত্রমুকুরের যদি কিছু সম্পত্তি থাকে তবে তাহা তাঁহাদেরই উৎসাহে ইহার অধিক আর বলিবার নাই।

গ্রন্থকারস্য

ঢাকা

বান্ধব কার্যালয়

২০ জুলাই ১৮৭৬।

প্রিয় * * বাবু!—

যদি অপাত্রে অনুগ্রহ করিয়া পরিক্রান্ত হন, তবে আমায় আর স্মরণ করিবেন না; আর যদি এই অহেতুকী শ্রদ্ধাই আপনার প্রকৃতির স্বাভাবিক গতি হয়, তবে আশা করিতে পারি চির দিনই এইরূপ অনুগ্রহ প্রদর্শন করিবেন।

আপনার অকালকোকিল আমার নিকট রহিয়াছে। আপনাকে বলা বাহুল্য যে আপনার লেখায় যেমন একটু তান আছে, তাহা আমি বড় ভাল বানি। আপনি একবার কোন ঐতিহাসিক ঘটনা অবলম্বন পূর্বক বান্ধবে একটি দীর্ঘ কবিতা দিবেন। ঐ রূপ কবিতা না হইলে আপনার সমুচিত বিকাশ হইবে না। অকালকোকিলের মত আরও দুটি কবিতা আমি উপহার পাইয়াছি। তন্মধ্যে একটি জঘন্য আর একটি উৎকৃষ্ট, কিন্তু আপনার অকাল কোকিলের নিকট হীনপ্রভ হইবে। যখন মুদ্রিত করি, তখন দুইটিই একসঙ্গে মুদ্রিত করিব কি না ভাবিতেছি।

আপনি যে কয়টি নূতন গ্রাহকের নাম দিয়াছেন তাঁহা-দিগের নিকট বান্ধব পাঠান হইয়াছে।

আপনার শারীরিক মঙ্গল লিখিয়া স্মৃতি করিবেন।

একান্ত আপনার
শ্রীকালীপ্রসন্ন ঘোষ।

পুরী—সমুদ্র তীর ।

প্রিয় * * *

১৮ই আগষ্ট ১৮৭৮ ।

বঙ্গদেশে গ্রন্থকারের অভাব থাকুক আর না থাকুক, আমার দৃঢ় বিশ্বাস যে সমালোচকের অভাব নাই । বঙ্গদর্শনের ভূতপূর্বে ক্ষণ জন্মা সম্পাদক হইতে ঐ “আড্ডা বিহারিণী পত্রিকার” সম্পাদক পর্য্যন্ত সকলই সমালোচক । অতএব তুমি যদি তোমার কবিতাগুলি প্রকাশ করিবার সঙ্কল্প করিয়া থাক তবে প্রকাশের পূর্বে আমার কি অন্য কাহারো মত জানিবার কিছুমাত্র প্রয়োজন নাই । বিশেষতঃ তোমার কবিতাগুলিতে “যুক্তাক্ষর ট ঠ ড ঢ ণ র ষ ইত্যাদি অক্ষরের অধিক প্রণয়” আছে কি না আমার স্মরণ নাই । সে দিন মাত্র একজন সমালোচক অনুগ্রহ করিয়া আমাকে বুঝাইয়া দিয়াছেন যে “স্বকবিজনোচিত রচনাতে এক্রপ প্রণয় অমার্জ্জনীয় ।” এমত অবস্থায় তোমার কবিতা সম্বন্ধে মত প্রকাশ করিয়া কেন আমি তীব্র কটাক্ষ ভাজন হইতে যাইব ?

তবে একটী কথা বোধ হয় বলিতে পারি । তোমার যে সকল কবিতা আমি তোমার মুখে শুনিয়াছি—যুক্তাক্ষর থাকিলেও তাহাদের কবিত্বে এবং লালিত্বে আমি মোহিত হইয়াছিলাম । আমার বোধ হইয়াছিল যেন কবিতা শ্রোতের ন্যায় বহিয়া গিয়াছে, কোন স্থানে কষ্ট কল্পনার চিহ্ন নাই, বরং স্মরণ হয় স্থানে স্থানে কবিত্ব শক্তির সুন্দর বিকাশ দেখিয়াছিলাম । বড় সুখের হইত যদি তোমার সুললিত আবৃত্তি শক্তি এ কবিতার সঙ্গে প্রকাশ করিতে পারিতে ।

তোমার বন্ধুতাভিলাষী,
নবীন ।

প্রিয় * * * বাবু !

আপনার পত্র পাইয়া পরম আপ্যায়িত হইলাম । পত্র মধ্যে * * মূল্যের যে টিকিট ছিল, তাহা বাক্সব আফিশে জমা করিয়া নিয়াছে ।

আপনি শিবজীর বিষয় আপাততঃ লিখিবেন না । সকলেই শিবজীর নাম গাহিয়া থাকেন ; সুতরাং শিবজীর নামে নূতনত্ব থাকিবে না । যদি আমার পরামর্শ গ্রহণ করিয়া করেন, তবে পৃথুরাজের স্বশৃপতি বীরচূড়ামণি সমরশায়ীকে অবলম্বন করিয়া সুদীর্ঘ একটা কবিতা লিখুন ; দুই তিন বারে প্রকাশ করিব । সমরশায়ীর বিষয় টড সাহেবের রাজস্থানে সন্নিবাসিত পাইবেন । অথবা আমার বলা অধিকন্তু কারণ এ সকল কথা আমা অপেক্ষা আপনারা অবশ্যই অধিক জানেন । সমরশায়ী স্বদেশের হিতকামনা ঘোরতর সমরব্রত উদ্‌ঘাপন করিয়া কাগ্নার নদীর তটে সমরশয্যায় শয়ান হন । যদি আপনি লিখেন তবে এই একটা কবিতাতেই যশঃস্বী হইবেন ; পৃথুরাজের ভগিনীর সহিত সমরশায়ীর প্রেম, সমরসাহী স্বদেশবাৎসল্য, উগ্রতেজঃ রণনৈপুণ্য ইত্যাদি কথা ঐতিহাসিকের লেখনীতেই কবিতার কমলীয় কাস্তি লাভ করিয়াছে ;—কবির তুলিকায় উহা কিরূপ চিত্রিত হইবে তাহা স্মরণ করিতেই আমার হৃদয় উল্লাসিত হইয়া উঠে ।

বাক্সবের প্রতি আপনার এবং সাহিত্য সমাজের যে সম্মেহ দৃষ্টি রহিয়াছে, ইহা আমার আশার অতীত । ভরসা করি এ অনুগ্রহের স্রোতে শীঘ্রই ভাটা লাগিবে না ।

আমি আমার স্বাস্থ্য সম্বন্ধে যে লিখি না সে লজ্জায় শিষ্টাচারের অনুরোধে রোজ মিথ্যা রোজ বলা যায় না । আর

“ভাল আছ” বলিয়া লিখিতেও আমার অধিকারনাই। এই
তিন চারিমাস যাবৎ আমি বড়ই কাহিল আছি আজ
একটুকু কালি একটুকু এই অবস্থা।

আপনি কেমন আছেন, লিখিয়া স্তুতি করিবেন। কোন
দিন আপনি যখন স্নকবি বলিয়া বঙ্গ সমাজে সমাদৃত হইবেন
যশের ঢকা একদিনে বাজে না,—তখন বিলুপ্ত নামা বান্ধবকে
স্মরণ হইবে কি ?

একান্ত আপনার
শ্রীকালীপ্রসন্ন ঘোষ।



চিত্ত-মুকুর ।

কলঙ্কী জয়চন্দ্র ।

১

কলঙ্কী নরের মন নরক সমান,
কি দরিদ্র কিবা রাজা ছুই সমতুল ;
সাক্ষাতে উভয় চিত্তে আনন্দের ভাণ,
বিরলে জ্বলন্ত চিতা যন্ত্রণার মূল ।
দিনেকের তরে কিস্বা ক্ষণেকের তরে,
কণামাত্র পাপ যদি পরশে কাহায়,
ভীষণ ভূজঙ্গ দন্তে যে বিষ উগরে,
সেই বিষ বহে সদা শিরায় শিরায় ;
বিস্মৃতি-সাগরে চিত্ত করিলে মগন,
নাহি পরিত্রাণ তবু দহিবে জীবন ।

২

আনন্দপ্রবাহে যদি ভাষাও হৃদয়,
সদা কলকণ্ঠ যদি পরশে শ্রবণ,
সদা অপ্সরার রূপ নয়নে উদয়,
অজস্র পীযুষ যদি কর আশ্বাদন,

তবু থামিবে না বিষ অন্তরে অন্তরে,
 প্রত্যেক শিরায় উহা বিদ্যুতের প্রায়,
 ছুটিবে উন্মত্ত-শ্রোতে আজীবন তরে,
 ঔষধ নাহিক বিশ্বে নিবাত্তে উহায় ;
 চিকিৎস্য করালদন্ত সর্পের দংশন,
 অচিকিৎস্য হতভাগ্য পাপীর বেদন ।

৩

ওই বসি বরাঙ্গনা স্মরম্য ভবনে
 ঢালিয়া নিবিড় কায় পালঙ্ক উপরে,
 দুই খানি কাম-ধনু যুগল নয়নে,
 চিরপূর্ণ ভূণ বাঁধা বন্ধের উপরে ;
 কেমন হাসিয়া তার নায়কের সনে
 করিতেছে প্রেমালাপ—উহার অন্তরে
 কি জ্বলন্ত শিখা আছে দেখিও গোপনে,
 স্মরিয়া আপন পাপ আপনি শিহরে ;
 সাগরের জলে যদি ডুবায় হৃদয়,
 তথাপি উহার পাপ ধুইবার নয় ।

৪

ওই পুনঃ বসি পাপী প্রেয়সির সনে
 নিরখিছে নিষ্কলঙ্ক বদন তাহার,

নিরখিছে প্রেমপূর্ণ যুগল নয়নে,
 শুনিতেছে প্রেমালাপ স্বধার আধার ;
 তথাপি দহিছে পাপ অভাগার মনে,
 তবু নিরানন্দ চিত্ত হায়রে উহার,
 বিগত পাপের স্রোত উথলি স্মরণে,
 অনুতাপ বিক্ষে হৃদে শলা শত বার ;
 নিঃশূল সাধুর স্থখ মুহূর্তের তরে,
 উদবে না আজীবনে পাপীর অন্তরে।

৫

ওই নিরখিছ যারে স্বর্ণসিংহাসনে
 শতরত্নে বিমণ্ডিত, ফুটিছে অধরে
 কেমন মধুর হাসি—দেখিও নির্জনে
 কি জ্বলন্ত ব্যথা আছে উহার অন্তরে ;
 কবে হরিয়াছে কার সতীত্ব রতন,
 বধিয়াছে কিম্বা কবে জীবন কাহার,
 সেই পাপময়ী চিন্তা করিয়া স্মরণ,
 অনুতাপে সদা চিত্ত দহিবে উহার ;
 জাগ্রতে স্মৃতির শিখা নিদ্রায় স্বপন
 চন্দ্র সূর্য্য মত নিত্য দিবে দরশন ।

৬

রাজা, রাজ্য—দুই শব্দ শুনিতে মধুর ;
 কিন্তু কি যন্ত্রণা আছে এ চারি অক্ষরে
 রাজা বিনা এ সংসারে বুঝে কয় জনে ?
 উচ্চ শব্দে মুগ্ধ হয় যত মূঢ় নরে,
 উন্নত প্রাসাদে বসি স্বর্ণসিংহাসনে
 হতভাগ্য নরপতি যে স্নখ না পায়,
 পর্ণের কুটিরে কিম্বা তৃণের শয়নে
 সামান্য ভিক্ষুক সদা ভুঞ্জিতেছে তায় ;
 দেখিতে শুনিতে ভাল কেবল রাজন
 সতত চিন্তায় তার আকুল জীবন ।

৭

যেই রাজদণ্ড রহে নৃপতির করে,
 সামান্য স্বর্ণপাতে হয়েছে গঠিত ;
 অচেতন ধাতুমাত্র—উহার ভিতরে
 ধর্মের পবিত্র আত্মা রয়েছে স্থাপিত ।
 রাজ্যমাত্রে রাজ দণ্ড করেছে ধারণ,
 কিন্তু ক-জনের করে হয়েছে শোভিত ;
 অধর্ম করেছে যেই রাজ্যের শাসন,
 রাজদণ্ড সদা তার হয়েছে কল্পিত ॥

ধার্মিকের করে উহা ধর্ম্মেতে উজ্জ্বল,
অধার্মিক করে শুধু স্ববর্ণ কেবল ।

৮

গভীর নিশিতে একা নির্জন উদ্যানে,
দুরাচার জয়চন্দ্র করিছে ভ্রমণ ;
কি চিন্তা বিরাজে আজ অভাগার মনে,
চল লো কল্পনে ! মোরা করি দরশন ।
নির্জন প্রকোষ্ঠে বসি খুলিতে হৃদয়,
শঙ্কিত ভাবিয়া ভিত্তি করিবে শ্রবণ ;
পালঙ্কে চাপিয়া বক্ষ ভাবিতেও ভয়,
পালঙ্ক বুঝিবে চিন্তা করিয়া স্মরণ
শিহরিছে স্থির তরু করি দরশন,
ভাবিছে উহার(ও) বুঝি আছয়ে শ্রবণ ।

৯

“এই-ত চক্রান্ত শেষ কিন্তু পরিণাম,
ভাবিতে এখন কেন শরীর শিহরে ;
যে কৌশল স্বজিয়াছি নিজ মনস্কাম
নিশ্চয় সফল হবে, গর্বিত পৃথুরে
রাখিব শৃঙ্খলে বাঁধি সিংহাসনতলে,
স্বজিব পাদুকা তার স্ববর্ণ মুকুটে,

রাজ্ঞী তার রবে পরিচারিকা-মণ্ডলে,
 প্রেয়সীর কাছে সদা রবে করপুটে;
 এই বার চূর্ণ হবে গৰ্ব্ব পাপাত্মার,
 কিন্তু কেন কাঁপিতেছে হৃদয় আমার ?”

১০

“হৃদয়ের মৰ্ম্মস্থলে কঠোর বচনে,
 উচ্চৈঃস্বরে যেন আত্মা করে তিরস্কার;
 ফিরাইতে চাই মন—তীব্র আকর্ষণে,
 যেন মন-সূত্র ধরি টানে পুনর্ব্বার ।
 ‘অধৰ্ম্ম—অধৰ্ম্ম’ শুধু পশিছে শ্রবণে
 কি অধৰ্ম্ম করিয়াছি না পারি বুঝিতে;
 অঁধারে ভীষণ চিত্ত নিরখি নয়নে,
 সতত যন্ত্রণা যেন উথলিছে চিতে,
 অচেতন শীলা কিংবা তরু গুল্মাচয়,
 নিরখিলে বোধ হয় যেন মূর্ত্তিময় ।”

১১

“ভ্রাতৃদ্রোহী ?—এই যদি অধরম হয়,
 পাপাত্মার শাস্তি তবে কোথায় সংসারে ?
 গৰ্ব্বিতের দৰ্প তবে কিসে হবে ক্ষয়,
 কে ঘুচাবে জগতের হেন অত্যাচারে ?

প্রজার পাপের শাস্তি প্রদানে রাজায়,
রাজার পাপের শাস্তি দিবে কোন্ জন ?
রাজার উপরে রাজা দণ্ডিতে তাহায়,
আছে যদি তবে ইহা পাপ কি কারণ ?
অধার্মিক হয় যদি গুরু আপনার,
নিশ্চয় দণ্ডিতে পাপ উচিত তাহার ।”

১২

“বিনয়ে চাহিনু যবে স্বত্ব আপনার,
যে উত্তর করেছিল দুরাশ্রয় তখন ;
ধিক্ মোরে ! এখনো সে অধরে তাহার,
সেই জিহ্বা রহিয়াছে সর্পের মতন ।
উচিত তখনি শাস্তি প্রদানিতে তার,
বুঝি না কেন যে হস্ত উঠেনি তখন ;
গরলের মত সেই বচন তাহার,
ভাসিতেছে চিত্তে মোর সদা সর্বক্ষণ ।
যত দিন অসম্পূর্ণ প্রতিজ্ঞা আমার,
দহিবে হৃদয় সদা গরলে তাহার ।”

১৩

“পাষাণের বক্ষ আর ক্ষত্রিয় হৃদয়,
এক উপাদানে দুই হয়েছে গঠিত ।

পাষণে অস্ত্রের লেখা অনন্ত অক্ষয়,
 অপমান ক্ষাত্র বক্ষে আজন্ম অঙ্কিত ।
 সমগ্র ভারত যদি হয় একস্তর,
 তথাপি প্রতিজ্ঞা মম করিব সাধন ।
 শুকাবে সাগর কিংবা লুটাবে ভূধর,
 প্রতিজ্ঞা নিষ্ফল মম হবে না কখন ।
 ক্ষত্রিয়ের পণ আর লিপি বিধাতার,
 ভবিতব্য দুই—দুই সম-দুর্নিবার ।”

১৪

“রাজ-নীতি একমাত্র সহায় আমার,
 শত্রুর নিধন অস্ত্র ইহায় গ্রথিত ।
 সূত্রে সূত্রে মিলাইয়া যদি একবার,
 পারি নিষ্কেপিতে লক্ষ্য করি নিরূপিত ;
 সমগ্র ভারত কিংবা সমগ্র ভূতল,
 রোধে যদি তবু উহা অব্যর্থ সন্ধান,
 আলোড়ি গগণ বক্ষঃ, সাগরের জল,
 শক্তিশেল সম উহা বিক্ষিবে পরাণ ।
 সম্ভব নিষ্ফল হবে সহস্রের বল,
 ব্যর্থ নাহি হবে কভু নীতির কোশল ।”

১৫

“নির্বোধ যবন অন্ধ রতনের লোভে
ভাবিয়াছে দিব রত্ন খুলিয়া ভাণ্ডার,
দহিবে অন্তর তার পরিণামে ক্ষোভে
রিক্ত হস্তে একে একে হবে সিন্ধুপার ।
মূৰ্খ নহে জয়চন্দ্র, তস্করের আশা
পূরাইবে শূন্য করি গৃহ আপনার ;
সিন্ধু লুটি বাড়িয়াছে বিষম পিপাসা
এই বার প্রতিফল পাইবে তাহার ।
তাড়িত মার্জ্জার মত বসিয়া আফ্গানে,
হেরিবে সতৃষ্ণ নেত্রে ভারতের পানে ।”

১৬

সহসা মর্ম্বর শব্দ পশিল শ্রবণে,
অমনি বিদ্যুৎ-বেগে ফিরায়ে নয়ন
নিরখিল চারিদিক্ শশঙ্কিত মনে,
ভাবিল যবন বুঝি করিছে শ্রবণ ।
তাজি দীর্ঘশ্বাস শেষে কহিল গম্ভীরে,
“কেন এত ভয় আজ হৃদয়ে আমার ?
জগৎ নিমগ্ন যেন সন্দেহের নীরে
প্রত্যেক ঝলকে ভীতি হয়েছে সঞ্চার ।

কেমনে আমার সেই নির্ভয় হৃদয়,
হইল শিশুর মত সতত সতয় ?”

১৭

“মৃত্যু—দুর্নিবার তাহা, অদ্য কিংবা অন্যদিন
অবশ্য ঘটিবে, নাহি ভাবি তার তরে,
তবে কোন ত্রাসে চিত্ত আনন্দবিহীন,
কে স্নহদ আছে হেন জিজ্ঞাসিব কারে ?
ইচ্ছা করে চিন্তা হতে যাই পালাইয়া
অথবা তুলিয়া ফেলি স্মৃতির দর্পণ,
কিংবা জন স্রোতে আত্ম-বিস্মৃতি লভিয়া,
বারেক শীতল করি অন্তর-বেদন ।
নিবে যাও শশধর তারকানিকর,
সহিতে পারে না আলো আমার অন্তর ।”

১৮

“সংসার ! কি ক্ষুদ্র তুমি নয়নে আমার,
জগৎ ! কি মরুময় আমার নয়নে !
প্রকৃতি কি বিষ-মাথা আকৃতি তোমার !
সম্পদ কি তুচ্ছতম আজ মম মনে !
স্নেহ মায়া প্রেম তোরা এত কি দুর্বল
নাহি পার ফিরাইতে অভাগার মন ?

ক্ষত্রিয়ের প্রতিহিংসা এত কি প্রবল !
মুহূর্তের তরে শান্ত নাহি হয় মন !
না হয় পৃথুরে ক্ষমি রব মিত্র ভাবে,
কিন্তু অন্তরের জ্বালা তা'হলে কি যাবে ?

১৯

ভবিষ্যৎ তোর গর্ভে অভাগার তরে,
কি আছে সঞ্চিত খুলি বারেক দেখাও ;
অনিশ্চিততার তীব্র যন্ত্রণা অন্তরে,
পারি না সহিতে—কিন্মা দেখাইয়া দাও
নিরাপদ স্থান হেন নাহিক যেখানে—
চিন্তা ক্ষোভ আশা তৃষ্ণা, ত্যজিয়া সংসার
ত্যজি আত্ম পরিজন রত্ন-সিংহাসনে,
করিব নিৰ্ম্মল মনে আত্মার সংস্কার ।
সাগরের জলে রাজ্য হউক মগন,
থাকিব অনন্যচিত্তে মুদিয়া নয়ন ।”

২০

“যদি সন্ধি ভঙ্গ করে সাহাব্ উদ্দীন,
আক্রমে কনোজ যদি করি প্রতারণা ;
শঠতায় যবনেরা সতত প্রবীণ,
তবেই ত সিদ্ধ হবে সকল কামনা ।

হত-বল সৈন্য দল দিল্লীর সমরে
 নারিবে রোধিতে উগ্র যবনের বল ;
 পাবক স্ফুলিঙ্গ মত পশিয়া নগরে,
 ধন প্রাণ ক্ষত্রিয়ের হরিবে সকল ।
 বারেক যবন সেনা প্রেবেশে যে স্থান,
 দন্ধ করি গৃহ দ্বার করয়ে শ্মশান ।”

২১

“এই শিরঃ যাহে আজ শোভিছে রতন,
 যবন দাসত্বভারে হবে অবনত ;
 এই হস্ত রাজ-দণ্ড করিয়া ধারণ,
 পূজিতে যবন পদ হবে নিয়োজিত ;
 বলয়ের পরিবর্তে শোভিবে শৃঙ্খলে,
 উদ্যানের পরিবর্তে রুদ্ধ কারাগার ;
 কিম্বা দিবে তুলি পদ এই বক্ষঃস্থলে,
 উঃ ! এ চিন্তা হৃদে সহেনা-ক আর ।
 ভবিষ্যৎ রুদ্ধ কর কবাট তোমার !
 এ নরকচিত্র নেত্রে সহেনা-ক আর !”

২২

তাজিল সুদীর্ঘ শ্বাস চাহি শূন্য পানে,
 নিবাবার তরে যেন গগনের আলো ;

ভাবিল আলোক রাশি পশিয়া পরাণে,
 অদৃশ্য ভাবনাগুলি করিছে উজ্জ্বল ।
 মুদিল নয়ন পুনঃ আবরিয়া কর,
 কিন্তু হৃদয়েতে যাহা হয়েছে অঙ্কিত
 মুদিলে নয়ন কেন হইবে অন্তর !
 বরং উজ্জ্বলতর হবে অনুভূত ।
 স্মৃতি-চিহ্ন হবে লোপ মুদিলে নয়ন,
 কিন্তু অপনীত কেন হইবে বেদন ।

২৩

জয়চন্দ্র ! ভবিষ্যৎ দেখিলে এখন,
 আর কেন, পাপ চিন্তা কর পরিহার !
 অবিশ্বাসী মিথ্যাবাদী সতত যবন,
 অলীক আশ্বাসে মুগ্ধ হইও না তার ।
 এখনি ছুটিয়া যাও পৃথুর সদনে,
 বীর তিনি ক্ষমিবেন অবশ্য তোমায় ;
 যে বিপদ সৃজিয়াছ ভেবে দেখ মনে
 এই প্রায়শ্চিত্ত ভিন্ন নাহিক উপায়,
 লজ্জা হয়, হুৎপিণ্ড কর উৎপাটন,
 করো-না ক্ষত্রিয়-নামে কলঙ্ক অর্পণ ।

২৪

কালের বিশালবক্ষে জ্বলন্ত অক্ষরে,
 থাকিবে অঙ্কিত এই কলঙ্ক তোমার ।
 স্থগিত হইয়া রবে চিরদিন তরে,
 হিন্দুমাত্রে প্রাতঃসন্ধ্যা দিবে তিরস্কার ।
 ছি ছি হেন নীচ বৃত্তি হৃদয়ে তোমার !
 কেন নিমন্ত্রিলে হায় দুরাত্মা যবনে ?
 অপহৃত রাজ্য তব করিবে উদ্ধার—
 কিন্তু পরিণাম তার ভেবে দেখ মনে,
 অপহৃত রাজ্য তব আছিল স্বদেশে,
 যবন-সাহায্যে তাহা পশিবে পারস্যে ।

২৫

আর ভারতের এই মৌভাগ্য তপন
 তোমার অদৃষ্টসনে হবে অন্তর্মিত ;
 হিন্দু-রাজ্য ভগ্ন উপকূলের মতন
 দিনে দিনে কাল-গর্ভে হইবে নিহিত,
 ফলিবে ইহায় যেই ফল বিষময়,
 কেবল নহেক তব দুঃখের কারণ ;
 কত শত বর্ষ ইহা হিন্দুর হৃদয়—
 দহিবে, হায়রে তাহা জানে কোন জন ?

সাধিতে কলুষ-ব্রত ওরে ছুরাচার !
ভারত-অদৃষ্ট কেন করিছ আঁধার

২৬

অদূরে তরুর পাশে দাঁড়া'য়ে গোপনে
স্থির সৌদামিনীরূপা একটি রমণী,
বদন গম্ভীর, দৃষ্টি প্রথর নয়নে,
নীরবে শুনিতেছিল রাজার কাহিনী
বস্ত্রণায় জয়চন্দ্র মুদিলে নয়ন
অগ্রসরি দাঁড়াইল সম্মুখে তাহার ;
স্থির দৃষ্টিে নিরখিয়া ডাকিল তখন
প্রাণেশ্বর !—

শিহরিয়া জয়চন্দ্র খুলিল নয়ন
হেরিল সম্মুখে তার রমণী-রতন ।

২৭

“শৈল ! তুমি কেন এই অনারত স্থানে ?
গভীর নিশায়—এই নিশাথ শিশির
জান না কি অপকারী, দেখ দেহ পানে
এখন(ও) আরোগ্য নহে তোমার শরীর,
চল গৃহে, বলি হস্ত করিল ধারণ ;
বিষ্কারি নয়ন, শৈল কহিল গম্ভীরে,

আমা হ'তে মূল্যবান তোমার জীবন,
তোমার উচিত নহে ভ্রমিতে শিশিরে ;
আমার—হায়রে যার সমুদ্রে শিবির
কি করিবে নাথ তার নিশির শিশির” ।

২৮

“বে অনল বক্ষঃস্থলে—থাক্ সে সকল,
বল প্রাণেশ্বর তব কি ভাবনা মনে ?
গত দিনকত ধরি নিরখি কেবল
নিমগ্ন সতত তুমি গভীর চিন্তনে ।
কারণ জিজ্ঞাসি যদি বিষ্কারি নয়ন
আমার বদনে চাহ, পুনঃ জিজ্ঞাসিতে
ফিরায়ে নয়ন ভূমে প্রহারি চরণ
‘কিছু না’ বলিয়া উঠি দাঁড়াও হ্রস্বিতে ;
তথাপি জিজ্ঞাসি যদি, সঞ্চালিয়া কর
বিরক্তে ইঙ্গিত কর হইতে অন্তর” ।

২৯

“ভাবিতাম পূর্বে ইহা চিন্তের বিকার,
দিন দুই পরে চিন্ত হইবে অস্থির ;
দিনে দিনে বৃদ্ধি এবে হইছে ইহার,
বল নাথ কেন এত হইলে অধীর ?”

“ বলিয়াছি একবার বলি আরবার
শরীর অসুস্থ মম বড়ই এখন
এই প্রসন্ন শৈল মোরে করিও না আর
যাও তুমি নিজ গৃহে করগে শয়ন ।”
বেষ্টিয়া হৃদয়ে বাহু—কুঞ্চিত নয়নে
ভ্রমিতে লাগিল জয় স্তম্ভ চলনে ।

৩০

“অসুস্থ !—ইহা কি তবে ব্যবস্থা তাহার
অনার্যত স্থানে এই নিশীথ-ভ্রমণ ?
প্রগল্ভতা প্রাণেশ্বর ক্ষম অবলার
অবশ্য ইহার আছে অপার কারণ ।
অন্তরের পীড়া ইহা মর্শ্বের যাতনা”—
জানু পাতি পতিপদ করিয়া বেষ্টিত,
“সত্য করি বল নাথ ত্যজি প্রতারণা
কোন পাপ-ভাবনায় মগ্ন তব মন ?
পত্নী যদি না বুঝিল পতির বেদন
স্বধু কি তাহার কার্য্য শোভিতে শয়ন” ?

৩১

“উঠ শৈল, কেন পড় চরণে আমার
জিজ্ঞাসিছ কিন্তু কিবা বলিব তোমায়,

রাজ-কার্য্যে চিত্ত মগ্ন সতত রাজার
 কেনা জানে—কেন পুনঃ জিজ্ঞাস আমায় ?
 প্রজার অদৃষ্টক্ষেত্রে ন্যস্ত যার করে
 সে যদি আমোদে মগ্ন রহে সর্ব্বক্ষণ,
 ভেবে দেখে ফল যাহা ফলিবে সত্ত্বরে,
 রাজ চিত্ত নহে শৈল ! আমোদ-কারণ ;
 একটি ভাবনা স্নধু তোমার কেবল
 শত ভাবনায় মম হৃদয় চঞ্চল ।

৩২

“একটি ভাবনা !” বলি উঠিয়া সত্ত্বর
 দাঁড়াইল শৈল গ্রীবা করিয়া উন্নত,
 দেহ অস্ত্র দেখাইব চিরিয়া অন্তর
 চিন্তার জ্বলন্ত বহি বিরাজিছে কত ।
 হ’তেম যদ্যপি আমি কৃষক-রমণী
 তখন হইত চিত্ত ভাবনা-বিহীন,
 সে সৌভাগ্যবতী নহে রাজার রমণী
 সতত চিন্তায় তার হৃদয় মলিন ;
 বুঝিত পুরুষ যদি রমণীর মন
 দেখিত তাহার চিত্তে কতই বেদন ।’

৩৩

“নাহি প্রয়োজন নাথ, সে সবে এখন
বল কোন্ রাজকার্য্য করিতে উদ্ধার
নিভৃত উদ্যানে একা করিছ ভ্রমণ
মাখিয়া শরীরে এই নিশার নিহার ;
শুনিয়াছি সব নাথ হইয়া গোপন,
এ পাপ মন্ত্রণা হায় কে দিল তোমাংরে ?
অসার প্রতিজ্ঞা তব করিতে সাধন,
নিমন্ত্রিছ নিজ গৃহে ঘৃণিত তস্করে !
প্রতিহিংসা যদি তব এতই প্রবল
ক্ষত্রিয় শরীরে তব ছিল না কি বল ?”

৩৪

“বীর-প্রসবিনী এই ভারত ভিতরে
ছিল না কি বীর তব হইতে সহায় ?
ভুলিয়া গৌরব নিজ সাধিলে তস্করে !
স্মরিলে আমি যে নাথ মরি হে লজ্জায় !
কায কি সহায় তব, এস মোর সনে
অপমান প্রতিশোধ প্রদানি তোমার,
এস নাথ আমি অগ্রে প্রবেশিয়া রণে
অপহৃত রাজ্য তব করিব উদ্ধার ।

দেহ দুই করে দুই উলঙ্গ কৃপাণ
দেখিবে যুঝিব একা বিদ্যুৎ সমান ।”

৩৫

“কিশোর সন্তান তব হইবে সহায়
বৈশ্বানর তেজে সেও যুঝিবেক রণে
ভয়ে ভীত যদি তুমি, চাহি না তোমায়
পশিতে সমরে, মোরা জননী-সন্তানে
অপহৃত রাজ্য তব করিব উদ্ধার ।
সেও যদি ভীত হয়, স্ত্রীতীক্ষ্ণ কৃপাণে
ছেদন করিব স্তন-যুগল আমার—
পালিয়াছি এত দিন যার দুগ্ধ দানে ।
অপুত্র বরং ভাল তথাপি কখন
হে বিধাতঃ ! ভীরা পুত্র নাহি হয় যেন ।

৩৬

“ভাগ্য-দোষে বীরপত্নী নহে অভাগিনী
কিন্তু ক্ষত্রিয়ের কূলে জনম আমার,
বীর-কন্যা আমি নাথ, বীর-প্রসবিনী
রক্ষিব যেমনে পারি গর্ব্ব আপনার ।
হ’তে যদি বীর তুমি দেখিতে এখনি
পারি কিনা কাষে যাহা কহিনু কথায়,

এই বক্ষে চূর্ণ হ'ত কতই অশনি
দলিতাম পদে শত্রু মাতঙ্গিনী প্রায় ;
যুঝিব দেহেতে রবে যতক্ষণ বল
জয় পরাজয় স্তম্ভ অদৃষ্টের ফল ।

৩৭

“যবন-আশ্রয় যদি প্রতিজ্ঞা তোমার
তক্ষরের, পামরের, নীচের আশ্রয়—
কেশাণ্ণ দেখিতে মোর পাইবে না আর
জনমের মত নাথ হইলু বিদায় ।
বিধবা হয়েছি যবে করিব শ্রবণ,
সেই দিন পুনর্ব্বার জনমের তরে,
একত্রে চিতার বক্ষে করিব শয়ন
বক্ষে করি দেহ তব ডাকিব ঈশ্বরে—
এজনমে এই শেষ যেন জন্মান্তরে
বীরপতি করি তোমা সমর্পণ মোরে ।”

৩৮

মুছিয়া নয়ন জল হরিত চরণে
প্রেবেশিল শৈলবালা মন্দিরে আপন,
অনিমেঘ নেত্রে জয় থাকি কতক্ষণে
বিষাদে নিশ্বাস ত্যজি কহিল তখন ;

করিব না যবনের সহায় গ্রহণ
 পশিব একাকী আমি দুর্ব্বার সমরে,
 না হয় সমরক্ষেত্রে হইব নিধন
 বীর বলি খ্যাতি তবু করিবে ত নরে ।
 যা কহিল শৈলবালা সঠীক সকল
 জয় পরাজয় স্মধু অদৃষ্টের ফল ।

৩৯

কিন্তু কাল প্রাতে যবে সাহাব উদ্দীন
 ডাকিবে পশিতে রণে তাহার সহিত,
 কি উত্তর দিব—সে ত নহে বুদ্ধিহীন,
 অভিপ্রায় বুঝিবে সে আমার নিশ্চিত ।
 এক শত্রু স্মরি যার এত ভয় হয়
 দুই শত্রু তার পক্ষে কত ভয়ঙ্কর !
 একত্রে উভয় রণ নিশ্চয় দুর্জয়,
 তাহে কুন্তকর্ণ সম যুঝিবে সমর
 মহম্মদে নাহি ডরি না ডরি পৃথুরে,
 ডরি স্মধু একা সেই সমরসায়ীরে ।

৪০

কি করিব কোথা যাব, কে আছে আমার
 কে দিবে বলিয়া মোরে নিগূঢ় উপায় ;

রমণীর বীর্যহীন হৃদয় যাহার
হা বিধাত ! প্রতিহিংসা কেন এত তায় !
কেনষা জ্বালিনু এই সমর অনল !
কেন নিমজ্জিনু এই দুর্জয় যবনে !
অন্তরে বাহিরে বহি হইল প্রবল
একা আমি হেন বহি নিবাব কেমনে ?
যা থাকে কপালে লব যবন-আশ্রয়
দেখিব কৌশল সিদ্ধ হয় কি না হয় ।

চিতা-শয্যা ।

১

গাঢ় অমাবস্যা-নিশি ঘোর অন্ধকার,
আছন্ন কালিমা মেঘে শূন্য চারিধার,
বদন বিস্তার ক'রে, গ্রাসিবারে বসুধারে,
মন্দ পদক্ষেপে যেন আসে দগুধর ।
ত্রাসে যেন সঙ্কুচিত বিশ্ব-চরাচর ।

২

এহেন নিশীথে বসি প্রকোষ্ঠে আপন,
সর্ব-সংহারিনী মূর্তি করি দরশন,

চপলা বিকট হাসে, ভুবন চমকে ত্রাসে,
 গভীরে জলদ করে ভীম গরজন ।
 স্তব্ধ বিশ্ব সেই রবে স্তম্ভিত পবন ।

৩

হেরি ছনয়নে স্তম্ভ অনন্ত আঁধার,
 গাঢ়তর কালিমায় ঢাকা চারিধার,
 সহসা জলদ রাশি, ভেদিয়া সম্মুখে আসি,
 দাঁড়াইল নারী এক অপূর্ব রূপসী ।
 ফুলের কবরী শিরে, দেহে ফুলরাশি ।

৪

প্রফুল্ল কমল দুটি মৃণাল সহিত,
 চারু করতলে তার হয়েছে শোভিত,
 গলে পুষ্প কণ্ঠমালা, বক্ষঃস্থলে পুষ্প-ঢালা,
 জীবন্ত ঘোবন যেন কুসুমের বেশে ।
 দাঁড়াইল কাছে মোর, মুখে মৃদু হেসে ।

৫

সরমে শিহরি শেষে চিনিবু তাহায়,
 বিজন-সঙ্গিনী মম প্রিয় কল্লনায়,
 বদন গভীর করে, কহিল বিষাদ-স্বরে,
 আইবু দেখিয়া এক দৃশ্য ভয়ঙ্কর,
 দেখিতে বাসনা যদি হও অগ্রসর ।

৬

চলিলু কল্পনা-সাথে ঘোর ত্রিযামায়,
দেখিতে ভীষণ দৃশ্য, বিরাজে কোথায়,
নদনদী গিরিবন, করি কত উল্লঙ্ঘন,
উপন্যাস দুইজনে বিস্তীর্ণ শ্মশানে—
তরু-শূন্য—প্রাণি-শূন্য—গৃহশূন্য স্থানে ।

৭

শ্মশানের বক্ষঃস্থলে নেত্রপাত করি
নিরখি ভীষণ দৃশ্য উঠিলু শিহরি,
উন্মাদিনী চিতাহাসে, দাঁড়ায়ে তাহার পাশে,
সুন্দর আয়ত-তনু যুবা এক জন,
রুক্ষ-কেশ—রক্ত-নেত্র—ভীম-দরশন ।

৮

একপদ পুরোভাগে, অপর পশ্চাতে,
অনতিবৃহৎ এক দণ্ডধরি হাতে,
জ্বলন্ত চিতার ক্রোড়ে, প্রবীণা রমণী পোড়ে,
নিবিড় চিকুর-জাল, বিস্তীর্ণ শিয়রে,
দুইখানি ক্ষীণ বাহু পড়ি দুই ধারে ।

৯

বদন অঙ্গারে ঢাকা চেনা নাহি বায়,
ক্ষীণ অঙ্গে অগ্নি-শিখা খেলিয়া বেড়ায়,

গ

দেহ ভস্ম নাহি হয়, পরিধানও দন্ধ নয়,
 সহসা দেখিলে হেন জ্ঞান হয় মনে,—
 জীবিতা প্রাচীনা স্পৃগ অনল-বিতানে ।

১০

সভয়ে যুবার পাশ্বে করিয়া গমন,
 জিজ্ঞাসিন্নু কার চিতা,—সে বা কোন জন;
 তুলিয়া জ্বলন্ত আঁখি, আমার বদনে রাখি,
 তীব্র ভাবে কতক্ষণ চাহিয়া রহিল,
 ভয়ঙ্কর দৃষ্টিতার—হৃদয় কাঁপিল ।

১১

রাখি ভূমে কাষ্ঠদণ্ড জলদ গম্ভীরে,
 কহিল ভীষণস্বরে মোর পানে ফিরে,
 “বুঝি বঙ্গবাসী হবে, নহিলে কেনবা কবে,
 কারচিতা, দেখ নয় জননী তোমার ;”
 হস্তে সরাইয়া দিল জ্বলন্ত অঙ্গার ।

১২

“সাতশত বর্ষ আজ দিবারাত্র ধ’রে
 এই শ্মশানের বক্ষে এই চিতা পোড়ে,
 শব দন্ধ নাহি হয়, দেহও এমতি রয়,
 ঢালিয়াছি কুস্তপূরে সিন্ধুসম জল,
 নিবে না এ চিতানল জ্বলিছে কেবল ।”

১৩

শিহরিণু নিরখিয়া রমণীর মুখ
যাতনায় ক্লিষ্ট যেন মূর্ত্তিমতী দুখ
নয়নের উৰ্দ্ধকোলে, নেত্র-তারা রহে ঢলে
জীবন চন্দ্রমা মরি নিশ্চিন্ত নয়নে,
অন্ত যায় আঁধারিয়া রমণী বদনে ।

১৪

লহরে লহরে শিখা শবের উপরে
বিকট ভৈরব রঙ্গে হেসে নৃত্য করে,
কভু শিরে কভু পায়, বহ্নি-শিখা ছুটে ধায়,
আবার দাঁড়ায়ে বক্ষে ভীমরঙ্গে হাসে,
নিরখি সে চিতানল কাঁপিলাম ত্রাসে ।

১৫

ভুষার-তর্জনী মম বক্ষের উপরে
রাখিয়া কহিল যুবা স্নগস্তীর স্বরে,
“চিনিলে কি চিতা কার,—চিতা ভারত মাতার
এইধর জননীর রাজ নিদর্শন,”
মুকুট রতনদণ্ড কস্মিন অর্পণ ।

১৬

সভয়ে মুকুট দণ্ড করিছু ধারণ,
নিরখিতে হায় মোর কাঁদিল নয়ন ;

ছিন্ন মুকুটের গায়, ভগ্ন-হীরা সমুদায়,
 মনি-চ্যুত রাজ দণ্ড তাও অর্দ্ধখান,
 কেকরিল এ দুর্দশা কার হেন প্রাণ।

১৭

চাহিনু চিতার পানে হাসিছে অনল,
 অচেতন তনু তায় পড়ি অচঞ্চল,
 সাধ হৈল একবার প্রাণশূন্য প্রাচীনার
 করে দণ্ড শিরে করি মুকুট স্থাপন,
 জননীর রাজবেশ করি দরশন।

১৮

“যাও চলি” পুন যুবা কহিল গম্ভীরে
 “ভারতের প্রতি ঘরে এই চিহ্ন ধরে,
 বালবুদ্ধ কি তরুণে, দেখাইও প্রতি জনে,”
 তর্জ্জনী হেলায়ে পথ করি প্রদর্শন
 রাখিল বদনে মম আরক্ত নয়ন।

১৯

সভয়ে ফিরায়ে আঁখি উপদিষ্ট পথে
 চলিনু বিহ্বল-চিত্তে কল্লনার সাথে,
 গাঢ়তর অন্ধকার, লক্ষ্যশূন্য চারিধার,
 গগনে জীমূত বৃন্দ গর্জিছে গম্ভীরে,
 ধাঁধিয়া নয়ন, দৃষ্টি রোধিছে চিকুরে।

২০

পশ্চাতে ফিরিয়া দেখি জ্বলে চিতানল
পাশ্বে ভীম-কায় মূর্তি দাঁড়ায়ে অচল
স্থির-চিহ্নে কতক্ষণ, করি চিতা দরশন
পশিল শ্রবণ-মূলে অক্ষুট বচন—
“দেখ ফিরে পাশ্বে তব পুন কোন জন ।”

২১

চকিতে চাহিয়া দেখি অতি ভয়ঙ্কর !
সন্মুখে শবের ছায়া—কাঁপিল অন্তর ;
ক্ষীণ হস্ত প্রসারিয়া,— শবনেত্রে নিরখিয়া,
কহিল, “মুকুটদণ্ড কর প্রত্যর্পণ,
ভীরা তুমি, পথে দৈত্য করিবে হরণ ।”

২২

ছায়ার দক্ষিণ হস্ত মুকুট ধরিল,
বাম হস্ত রাজ দণ্ডে আসি পরশিল,
সভয়ে চীৎকার করে, পড়িছু শ্মশানোপরে,
কতক্ষণ ছিনু তথা নাহিক স্মরণ,
নেত্র খুলি দেখি কক্ষে করিয়া শয়ন ।

২৩

কল্পনা নাহিক পাশ্বে প্রকোষ্ঠ নির্জ্জন
গগনে অজস্র ধারা হইছে পতন,

প্রাচীরে আলোক হাসে, মসী, পত্র পড়ি পাশে
 শূন্যমনে কতক্ষণ বসিয়া রহিনু,
 কতবার স্মরি চিতা শিহরি উঠিনু ।

২৪

তদবধি কত রাত্রি গগনের গায়,
 দেখিয়াছি সেই শব সজীব ছায়ায়,
 ক্ষীণ হস্ত প্রসারিয়া, শবনেত্রে নিরখিয়া,
 পরশিতে হস্ত মম শূন্যে নামি আসে,
 অগনি নয়নদ্বয় মুদিয়াছি ত্রাসে ।

অভাগিনী ।

১

আহা কি করুণ ছবি রমণি তোমার !
 হায় কি কঠিন প্রাণ পোড়া বিধাতার !
 নীলোজ্জ্বল এ নয়নে, বারে অশ্রু প্রতিক্ষণে,
 স্খামাখা এ বদনে, রেখা যন্ত্রণার !
 হেমোজ্জ্বল এ বরণে, ল্লানবেশ অযতনে,
 ভস্ম আচ্ছাদিত মরি প্রতিমা সোণার !
 নিরখি এ বেশ প্রাণ নাহি কাঁদে কার !

এখনো বালিকাবেশ, অনতি-কৌমার শেষ,
 যুগল লাবণ্য ছ্যাতি ঢল ঢল করে ;
 না জানি কেমন করে, বিধাতারে এ অন্তরে,
 করিলে এ বজ্রপাত নিদয় অন্তরে,
 স্থাপিলে রাহুর গ্রাসে পূর্ণ শশধরে !
 ইচ্ছাকরে বরাঙ্গনে, তুলে লই সযতনে,
 মলিন এ দেহখানি পরম আদরে,
 মুছাইয়া দিই অশ্রু পবিত্র অন্তরে ।

২

নিদারুণ শাস্ত্রকার কোথা এ সময়,
 দেখ না বারেক আমি রমণী-হৃদয়,
 বসি যবে নিরজনে, ঝরে অশ্রু ছুন্য়নে,
 দেখে সমাজ তার করুণ বদন,
 কোমল অন্তর তার, কত পোড়ে অনিবার,
 নিদারুণ পিতা মাতা কর দরশন,
 হায়রে ছুথির ছুংথ বুঝে কোন জন্ !
 এস তুমি অনাথিনী, আমি তব ছুংথ জানি,
 কহনা ছুথের কথা আমার সদনে,
 এস সখি তুমি আমি কাঁদি ছুই জনে ;
 গগন বিদীর্ণ করে, এস কাঁদি তার স্বরে,

দেখ যদি পশে উহা বিধির শ্রবণ,
 অথবা অন্তর খুলে, দগ্ধ প্রাণ করে তুলে,
 দেখাও যন্ত্রণা তব—সমাজ তখন,
 বুঝিবে অবলা সহে যতেক বেদন ।

৩

চির অনাথিনী করি রমণী তোমারে,
 সৃজিয়াছে বিধি স্নধু কাঁদিবার তরে,
 সোণার বরণে তাই, ঢালিয়া দিয়াছে ছাই,
 আঁধারিয়া যৌবনের নন্দনকানন,
 স্নধুই নয়নজল, বরষিতে অবিরল,
 এ কুরঙ্গ আঁখি তব হয়েছে সৃজন,
 নির্মল শশাঙ্কে হায় কলঙ্ক লেপন !
 যৌবন উজ্জ্বল করে, পূর্ণবিশ্ব এ অধরে,
 সৃজিয়াছে স্নধু হায় বিষাদের তরে,
 রমণীরে ও অধরে, বিষাদের চিহ্ন ধরে,
 এসোনা এসোনা আর আমার সদনে,
 এ করুণ ছবি তব সহে না পরাগে ;
 সখি মোর মাথা খাও, বিষাদে বিদায় দাও,
 ফেটে যায় বুক মরি হেরি ও বয়ানে !
 কুস্মে অশনিপাত বড় বাজে প্রাণে !

৪

কি সান্ত্বনা দিব আর রমণি তোমায়,
 এ অনল শিখা তব নিবিবার নয়,
 কাঁদ অয়ি বিষাদিনি, কাঁদ অয়ি অনাথিনি,
 হেরিয়া বিদৌর্ণ হোক হৃদয় আমার,
 এমন নিষ্ঠুর দেশে, এরূপ মধুর বেশে,
 কেন জন্মেছিলে তুমি স্নধা-নিস্যন্দিনি !
 মরুভূমে বাঁচে কভু মৃগাল-নন্দিনী !
 এই যদি ছিল মনে, পোড়া বিধি কি কারণে,
 এত রূপ দিল ঢালি তোমার বদনে,
 অতি কুরুপিনী করে, কেন রাখিল না তোরে,
 বিষাদের চিহ্ন তায় মিশায়ে থাকিত,
 অঁধারে তিমির আভা লুকায়ে রহিত ;
 দেখি সে মলিন মুখ, হইত না এত দুখ,
 সেনয়নে অশ্রু হেরি কাঁদিত না মন,
 কেন তুমি রূপবতী হইলে এখন !

৫

চির অভাগিনী যদি কেন তবে আর,
 অকারণ হেন বেশ রমণি তোমার,
 খুলে ফেল এ বসন, খুলে ফেল এ ভূষণ,

লুকায়ে রূপের ছটা সাজ বিষাদিনী,
 গেরুয়া বসন দিয়ে, চারু তনু আবরিষে,
 খুলিয়ে চিকুর দাম সাজ সন্ন্যাসিনী,
 এ ঘন লাবণ্যে দাও ভাস্কর লেপনী ;
 ত্রিশূল ধরিয়া করে, লেখ তায় স্পর্শাক্ষরে
 “পতিস্বথ কাঙ্গালিনী বঙ্গের দুঃখিনী ।”
 নয়নে ঝরুক জল, শুকাক বদনতলে,
 গভীর ঝঙ্কারে গাও “আমি অনাথিনী”
 রাজরাণী হয়ে মরি সাজ ভিখারিণী ।
 কমণ্ডলু ধরি করে, বঙ্গবাসী দ্বারে দ্বারে,
 কাঁদিয়ে শুনাও তব দুঃখের কাহিনী,
 দেখ যদি জাগে তাহে নিদ্রিত অবনী ।

উদাসীন ।

পাষণে বাঁধিনু প্রাণ তবু কেন মন
 নিরন্তর অনিবার হয় উচাটন ?
 বিসর্জিনু স্মৃতি-চিহ্ন বিস্মৃতির জলে
 তথাপি অন্তর কেন পুড়িছে অনলে ?

আইনু সন্ন্যাসী হ'য়ে দূর দেশান্তরে,
 হায় রে সে সব পুন কেন মনে পড়ে !
 সেই ত উদাস মন সেই সে যাতনা,
 সেই সে নীরস আঁখি অতৃপ্ত বাসনা ।
 কোথায় সে স্মৃতি এবে যাহার আশায়,
 ছিঁড়িলাম জীবনের সন্তোষ-লতায় ।
 মায়া মোহ স্নেহ প্রেম করিরা বর্জ্জন,
 এই কি হইল শেষ অশ্রু বিসর্জ্জন !
 কেন আঁখি ফেল বারি কেন কাঁদ মন ?
 বারেক ভুলিতে দাও এ ঘোর বেদন ।
 ওই দেখ শ্বেত আভা গগনের গায়,
 নীরবে গোধূলি সনে কেমন মিশায় ।
 শান্তি নিকেতন ওই প্রাচীন বিটপী,
 কত স্নগস্তীর ভাবে শোভিছে অটবী ।
 ওই শুন ঝাঁ ঝাঁ ডাকে জগত ঘুমায়,
 নীরব উদ্যান কত স্নগস্তীর তায় !
 কেমন গোধূলি ছায়া চারি দিকে ভাসে,
 এ শোভা হেরিয়া তবু নেত্রে অশ্রু আসে !
 আবার ঝরিল অশ্রু—কোথা ভগবান,
 নিবাও এ স্মৃতি-শিখা করুণা নিধান ।

অন্তরে শাশান লয়ে কত কাল হায়,
 ভ্রমিব উদাস হয়ে জীবের ধরায়।
 প্রতিশ্বাসে অগ্নি শিখা হয় উদগীরণ।
 প্রত্যেক পলকে পোড়ে যুগল নয়ন।
 একি লীলা পিতা তব, সহে না বেদনা
 রাখ তব দেব-খেলা,—নিবাও যাতনা।
 এখনি নিবাতে পারি মনের অনল,
 পরকাল ভাবি নাথ ডরাই কেবল।
 এস পিতা, লহ হরি বারেক চেতন,
 ভুলি এ ভবের কথা জুড়াই জীবন।
 ভুলি জন্মভূমি—হায় জাগিল আবার,
 সংসারের চিত্রপট হৃদয়-মাঝার।
 নমি মাতঃ! পদযুগে, জীবিত এখন,
 পামর মানবকূলে তব কুসন্তান।
 আসিয়াছি দেশান্তরে তবু কাণে শুনি,
 সেই স্নেহ স্রোতস্বিনী স্নমধুর ধ্বনি।
 নীরব নিশীথে কভু গভীর স্বপনে,
 ভাসে তব প্রতিমূর্তি মুদিত নয়নে।
 স্নেহের শৈশব হায়, এখনো স্মরণ,
 সেই ক্রোড় সে আদর স্নেহের চুশ্বন।

চিন্তা-মুকুর ।

গভীর ত্রিযামা নিশি নীরব ভুবন,
শয্যার কোমল ক্রোড়ে করিয়া শয়ন
থাকিতাম । তুমি মাত ! শুভ্র বাতি করে,
দেখিতে আমায় ধীরে প্রবেশিতে ঘরে ।
ভাবিয়ে স্নানপুত্র হায় কতই যতনে,
আদরে প্রগাঢ় স্নেহে চুম্বিতে বদনে ।
ফুরাল সে দিন, পুন উদিল বোঁবন,
বাড়িল সে সঙ্গে তব আশা আকিঞ্চন ।
কেন ম্মা জননী হায় কেন এ সন্তানে,
ভুষিলে পাশুদ দানে তেমনি যতনে !
নিষ্ঠুর মানব আমি পামর সন্তান,
ভাল প্রতিশোধ তার করিলাম দান ।
এখনো কি ঝরে মাত ! নয়নে তোমার,
অন্তর বিদৌর্ণ হয়ে শোকের আসার !
এখনো কি পূজ নিত্য ইষ্ট দেবতায়,
সন্তানের সনাতন মঙ্গল আশায় ?
জানি আমি চিরদিন ঝরিবে নয়ন,
চিরদিন ইষ্ট দেব করিবে অর্চন ।
দিবা সন্ধ্যা দীর্ঘ স্থাসে বাড়িবে হতাশ,
তবু ত্যজিবে না মাত ! আমার প্রয়াস ।

কিন্তু হায় এ পামর নির্মম হৃদয়,
 করুণা পরশে আর দ্রবিবার নয় ।
 পাষাণে বেঁধেছি প্রাণ পাষণ রহিব,
 এই তরু-তলে বসি একাকী কাঁদিব ।
 হইবে গভীর নিশি দূরে ঝাঁঝাঁরব,
 আঁধারে ডুববে বিশ্ব জগত নীরব ।
 এই শুষ্ক তৃণদলে করিয়ে শয়ন ।
 খুলিয়ে প্রাণের দ্বার করিব রোদন ।
 কত যে গভীর স্মৃতি এ হেন রোদনে,
 কেঁদেছে যে এক বার সেই জন জানে ।
 আবার উদিলে শশী উঠিয়া বসিব,
 হেরি স্নলোলিত শোভা আপনি হাসিব ।
 শাখায় ফুটিবে ফুল লতায় কমল,
 নাচবে মলয়ে ধীরে নব পত্র দল ।
 গাহিবে কোকিল দূরে ছুটিবে স্তম্বর,
 মধুর সঙ্গীত-স্রোতে প্লাবিত অস্তর ।
 কিন্তু নিরন্তর মাত ! অন্তর তোমার,
 বিষম বিষাদ তাপে হইবে অঙ্গার ।
 অসহ্য এ চিন্তা, বিভূ হউন সহায়,
 ভুলি জননীর দুখ ভুলিব তাঁহায় ।

পুনঃ তুমি ! এস প্রিয়ে বহু দিন পরে,
 সন্মোখি বারেক আজ প্রণয়ের ভরে ।
 ললিত লবঙ্গ-লতা কোমল গঠন,
 সলাজ প্রণয়-পূর্ণ যুগল নয়ন ।
 হাস্য-বিকসিত মুখ প্রভাত-নলিনী,
 ভালবাসা-স্রোতস্বিনী প্রণয়ের খনি ।
 বসন্ত-কুসুম এই নবীন যৌবন,
 লজ্জা-প্রেম-বিগলিত অপূর্ব গঠন ।
 কোন্ শিব পূজি প্রিয়ে পেয়েছিলে বর,
 তাই সে লভিলে পতি নিষ্ঠুর পামর ?
 হেরিতে আমার পানে সজল নয়নে,
 অন্তরের দুখ যেন তুলিয়া বদনে ।
 চাহিলে তোমার পানে লজ্জায় বদন,
 নত করি লুকাইতে মনের বেদন ।
 কাঁদিয়াছ কত দিন হইয়া নির্জন,
 তাহাও গোপনে থাকি করেছি শ্রবণ ।
 তবু মুহূর্তের তরে করিয়ে যতন,
 করি নাই প্রেম-ভরে হৃদয়ে স্থাপন ।
 দেখিতাম শুনিতাম প্রেয়সি সকল,
 ভাবিতাম কাঁদিতাম অন্তরে কেবল ।

ভাবিতে পাগল পতি প্রাণের সরলা,
 বুঝিতে নারিতে প্রিয়ে অন্তরের জ্বালা ।
 ভালবাসিব না হয় ছিল যদি মনে,
 কেন বাঙ্কিলাম তোরে উদ্ধাহ বন্ধনে ।
 আশ্রাণ করিতে যদি নাহি ছিল মন,
 কেন তুলিলাম হেন কানন-প্রসূন ?
 পরিব না গলে যদি হেন রত্ন-হার,
 কেন গাঁথিলাম মাণ্ড্যে এ প্রেম-ভাণ্ডার !
 তুষিব না যত্নে যদি আছিল অন্তরে,
 স্বাধীন বিহঙ্গ কেন বাঁধিনু পিঞ্জরে ?
 ছিল শোভি বনরাজি ফুল্ল সরোজিনী,
 সৌরভে পূরিয়া বন বিশ্ব-বিনোদিনী ।
 হেরি কোন ভাগ্যবান উন্মত্ত নয়নে,
 লইত হৃদয়ে তুলি পরম যতনে ।
 রাজার উদ্যান কিম্বা ধনীর আগারে,
 ফুটিয়া থাকিত সদা আনন্দের ভরে ।
 অনন্ত দুখিনী কেন করিলাম হায়,
 নব অঙ্কুরিত চারু প্রেম-লতিকায় ।
 ভুলেছি অনেক, ক্রমে ভুলিব সকল,
 ভুলিতে নারিব কিন্তু তোমায় কেবল ।

সলিল-প্রতিমা ।

১

সুন্দর নিদাঘ-সন্ধ্যা শান্ত নভস্তল,
শ্যামাঙ্গিনী যমুনার হৃদয় নিৰ্ম্মল,
বহে য়ুত সমীরণ, নদী-বক্ষ নিরঞ্জন,
একা ভাসি তরি'পরে তরঙ্গিনী-জলে,
শূন্যময় দুই তীর স্তম্ভ তরি চলে,
শূণ্য দৃষ্টি শূন্য মন, তবু করি দরশন,
নয়ন নদীর জলে অন্তর কোথায় !
ক্ষেপণির য়ুত রব অবগে মিশায় ।
সলিল-আবর্ত হেরি, যায় ছুটি ঘূরি ফিরি,
আবার অনতিদূরে সলিলে মিশায়
অস্তমান ভানু-ছবি নাচিয়া বেড়ায় ।

২

সহসা একটি ছবি সলিল-হৃদয়ে
দেখিনু মানস-নেত্রে রয়েছে মিশায়ে ;
মলিন বিজলি-মত, ভস্ম মাথা মরকত,
ছিন্ন লতা কিম্বা যথা তপন কিরণে
হতাশ আয়েষা কিম্বা বঙ্কিম-কল্পনে ।

স্বদীর্ঘ নিশ্বাস ছোট্টে, নয়নে তরঙ্গ ওঠে,
 বিষাদের জ্যোতি ফোট্টে নীরব বদনে,
 একখানি ফটোগ্রাফ হেরিছে সঘনে ।
 কখন চুম্বন করে, কভু রাখে বক্ষোপরে,
 সতৃষ্ণ নয়নে পুনঃ করে দরশন ।
 নিরখি অন্তর হ'ল বিষাদে মগন ।

৩

অচেতন কাণে পুনঃ করিনু শ্রবণ
 সলিল-প্রতিমা মুখে করুণ বচন—
 “কত সাধ কত আশা, কত প্রেম ভালবাসা,
 প্রাণেশ্বর নিরন্তর রেখেছি অন্তরে,
 বারেক তোমায় যত্নে দেখাবার তরে ;
 হুচিকন পুষ্প-হার, গাঁথিয়াছি কতবার,
 দোলাইতে তব গলে—কতই যতনে
 কবিতা লিখেছি কত মনের বেদনে ।
 অশ্রু-মুখে বিধাতায়, ডাকি সদা কত হায়,
 বধির বিধাতা নাথ আমার কপালে”
 পূরিল যুগল আঁখি পুনঃ অশ্রুজলে ।

৪

“কেন উদাসীন নাথ কি দুঃখ অন্তরে
 বারেক হৃদয় খুলে কহ না আমারে

নবীন বয়সে হেন, উদাসীন বেশে কেন,
 ত্যজি গৃহ পরিজন, ভ্রম দেশান্তরে?
 একবার বল নাথ দুখিনী কান্তারে ।
 এতই বেদনা যদি, কেন দূরে নিরবধি,
 এস কাছে প্রাণেশ্বর কাঁদি ছুই জনে ।
 মুছাইব অশ্রুজল অঞ্চল বসনে
 ধন নাই— দুখ তাই, ধনে প্রয়োজন নাই
 উভয়ে পরম স্নেহে রব তরুতলে”
 পূরিল যুগল আঁখি পুন অশ্রুজলে ।

৫

“এস নাথ বড় সাধ কাঁদিব ছুজনে
 হেরিব সে স্নান মুখ সজল নয়নে,
 বদনে বদন রাখি, তব অশ্রুজল মাখি,
 ঘুমাব হৃদয়ে পড়ি ক্ষুধা তৃষ্ণা ভুলি,
 কোথা রবে দুখ—নাথ সব যাবে ভুলি ।
 ভিখারিণী-বেশ ধরে ভ্রমিব হে দ্বারে দ্বারে,
 আপনি খাওয়াব হাতে, সেবিব যতনে ;
 ডুলাইব নাথ তব মনের বেদনে ।
 অন্য দুখ থাকে মনে, তাও নাথ প্রাণপণে,

ঘুচাতে সেবিব পদ দিবাদগু পল
এস নাথ একবার নিকটে কেবল ।”

৬

কাঁদিল পরাণ শুনি রমনী-রোদন
কাঁদিল নয়ন হেরি রমনী-রতন !
যতনে আদর করে, জিজ্ঞাসিনু স্নেহভরে,
“কে তুমি দুখিনী ভাস সলিল-শয়নে,
তুলিয়া শোকের সিন্ধু পঙ্কজ-বদনে ?
অক্ষুট মুকুল হায়, এ গভীর প্রেম তায়,
কে তুমি সরলে, বল কোন ভাগ্যবান
এ অমৃত স্রোতে সদা যুড়ায় পরাণ ?”
মুছিয়া নয়ন-জল, ফুলায়ে বদন তল,
কহিল কাঁপায়ে দুটি চারু ওষ্ঠাধর
“আমি অভাগিনী নাথ তুমি প্রাণেশ্বর”

কে গাহিল ।

১

কে গাহিল—কি মধুর—ওই যে আবার—
ছুটিল সঙ্গীত-স্রোত ভাসায়ে গগণ !

একি!—এ যে ভেসে যায় হৃদয় আমার
 নিশীথে কে করে হেন স্মৃধা বরিষণ!
 আবার—আবার—গায়,
 পুন চিত্ত ভেসে যায়,
 নারী-কণ্ঠ!—বটে তাই,
 ছুটিয়া গবাক্ষে যাই
 দেখিলাম—কি দেখিনু—কি বলিব হায়!
 স্থির সৌদামিনী-লতা পড়িয়া ধরায় ।

২

জ্যোৎস্না-প্লাবিত দূর সরসীর তটে,
 কৌমুদি কিরণে স্নাত পাষণ সোপানে,
 পড়িয়া প্রতিমা খানি যেন চিত্রপটে,
 বিস্তৃত নয়ন দুটি গগনের পানে
 বাম গণ্ড বাম করে,
 বাতাশে কুন্তল নড়ে,
 নিশিগন্ধা বসন্তের,
 কিম্বা শশী শরদের,
 ললিত সপ্তমে গায় সঙ্গীত লহরি
 পীযুষ প্রবাহে মত্তা নীরব সর্ব্বরা ।

৩

আবার সঙ্গীত-শ্রোত উঠিল উথলি,
 আবার প্রকৃতি-চিত্ত উঠিল আকুলি,
 নাচিল সরসি জল নাচিল পবন,
 নাচিল শাখায় পাতা লতায় প্রসূন,
 হরষিত নীলান্বরে,
 হাসিয়া কিরণ ঝরে,
 মরি কি গভীর তান,
 আকুল করিল প্রাণ,
 অবসে মৃদুল খাদে গড়ায়ে পড়িল,
 হৃদয়ের শ্রোত মম সঙ্গীতে মিশিল ।

৪

শুনিয়াছি বসন্তের কোকিল-কূজন,
 শুনিয়াছি বাঁশরীর মধুর নিরঞ্জন,
 হাসি-পূর্ণ বিশ্বাধরে,
 ! নর্ভকী মধুর স্বরে,
 গাহিয়াছে মূলতান,
 শুনিয়াছি সেই গান,
 কিন্তু হেন উম্মাদিনী জীবন্ত রাগিনী
 শুনি নাই—হেন গীত চিত্ত-বিপ্লাবনী ।

৫

শুনিলাম—কিন্তু কভু শুনি বনা আর
 স্নধুই হারানু চিত্ত সঙ্গীত শ্রবণে,
 স্নথের পিপাসা চিত্তে কেন ছুর্নিবার
 সাধের সামগ্রী কেন দুর্লভ জীবনে ?
 ইচ্ছা করে দিবানিশি,
 এই গবাক্ষেতে বসি,
 ওই স্নমধুর গান,
 শুনিয়া যুড়াই প্রাণ,
 বুঝেনা স্বাধীন পাখী পথিকের মন
 ঢালিয়া সঙ্গীত-স্রোত করে পলায়ন ।

৬

শুনিব না আর, যদি গাহ একবার
 হৃদয়-কবাট আমি করি উদ্ঘাটন,
 গাহ তুমি বরষিয়া স্নধা পারাবার,
 রেখে দিই চিত্তে আমি করিয়া বন্ধন ।
 কি শয়নে কি স্বপনে,
 উথলি উঠিবে প্রাণে,
 বাজিবে তরঙ্গ বুকে,
 উঠিবে উথলি স্নথে,

তুলিয়া সপ্তমে তুমি গাহ বিহঙ্গিনী
বেঁধে রাখি বক্ষঃস্থলে তব প্রতিধ্বনি ।

দুঃখিনী রমণী ।

১

সজীব সৌন্দর্য্যপূর্ণ রমণী-বদন
অতল সুধার উৎস নয়ন যুগল
বিষাদে মলিন দেখি আছে কোন জন—
রহে স্থির ? কার নেত্রে নাহি ঝরে জল ?
দেখিয়াছি কত শত যন্ত্রণা নয়নে,
অন্ধ খঞ্জ দেখিয়াছি করিতে রোদন,
কিন্তু হয় অশ্রুমুখী রমণী-বদনে
নিরখিয়া কেন আজ কাঁদে মম মন ?

২

পূর্ণিমা-যামিনী, ভাসে শশাঙ্ক গগনে,
বিতরি ধরণি-অঙ্গে কৌমুদি বিমল,
আন্দোলিছে ধীরে ধীরে নৈশ সমীরণে
নীরবে তরুর পত্র সরসীর জল,

শ্বেত সোপানের অঙ্কে প্রসারি চরণ,
 হেলাইয়া চারু তনু সোপান-প্রাচীরে,
 বসিয়া রমণী ওই,—চুম্বিয়া চরণ
 আনন্দে সরসী-জল নাচিতেছে ধীরে ।

৩

গভীর নিশিতে একা নির্জন উদ্যানে
 বসি উদাসিনী বালা সরসীর তীরে,
 বিস্তৃত নয়নদুটি চাহি উর্দ্ধ পানে,
 অপাঙ্গে সলিল ধারা ঝরিতেছে ধীরে ;
 সে মলিন মুখে পুনঃ জীবন-সঙ্গীত —
 তীব্র যন্ত্রণার স্রোত বহিতেছে ধীরে ;
 পরশি সে উষ্ণ বায়ু সঘনে কম্পিত—
 হইতেছে বিশ্বাধর তিতি অশ্রুণীরে ।

৪

“কেন তবে জগদীশ সৃজিলে আমারে !
 সৃজিলে যদ্যপি কেন করিলে দুখিনী !
 দুখিনী করিলে যদি কেন না অঁচিরে
 জীবনের শেষ অঙ্ক মুছিলে তখনি !
 অনন্ত মরুর বক্ষে উষ্ণ বালুকায়
 চাপি বন্ধ কত কাল রহিব বাঁচিয়া !

অস্থির পরাণ নাথ দারুণ তৃষায়,
কে রাখিবে প্রাণ মম বারি-বিন্দু দিয়া ।

৫

শৈশবে জীবন যদি হ'ত অবসান,
দহিতে হ'ত না আজ এ চির অনলে ।
নবীন যৌবনে বক্ষে চাপিয়া পাষণ,
ভাসিতে হ'ত না এই নিরাশার জলে ।
রাজার নন্দিনী আমি আজন্ম সুখিনী,
বালিকা যখন,—ছিল কত সাধ মনে;
সে সাধ পূরিল ভাল, চির অভাগিনী,
আমরণ অশ্রুজল ঝরিবে নয়নে ।

৬

ইচ্ছা করে ছুটে যাই কানন-মাঝারে,
পড়িয়া তরুর তলে কাঁদি একাকিনী ।
এ দুখ কহিব কারে নির্মম সংসারে,
কে বুঝিবে—কে শুনিবে—আমারকাহিনী ।
কভু ইচ্ছা করে ছুরী বিক্ৰিয়া হৃদয়ে,
জীবনের দুখ-লীলা করি অবসান ।
সিহরি আতঙ্কে পুনঃ পরকাল-ভয়ে,
দুখের সাগরে উঠে বিষম ভুফান ।

৭

হায় পিতঃ কেন আর চির-অভাগিরে,
 স্নেহ মমতায় সদা করিছ পালন ।
 ভাসাইয়া দেহ মোরে জাহ্নুবীর নীরে,
 এ মুখ দেখিয়া কেন পাইবে বেদন ।
 শুষ্ক পল্লবের মত যাইব ভাসিয়া,
 প্রবল তরঙ্গ-স্রোতে সাগরের জলে ।
 এ ভঙ্গ জীবন-তরি যাইবে ডুবিয়া,
 দহিতে হবে না আর নিরাশা-অনলে ।

৮

মূর্ত্তিমতী দয়া তুমি জননী আমার,
 কত যত্নে কত স্নেহে পালিছ আমারে,
 কিন্তু মাগো ভাঙ্গিয়াছে কপাল যাহার,
 স্নেহ-বিড়ম্বনা কেন অকারণ তারে ?
 কেন নীলাম্বরী আর কেন অলঙ্কার ?
 কেন লৌহ হাতে কেন সিন্দূর কপালে ?
 কেন যত্নে বেঁধে দাও কবরী আমার ?
 দুখিনীর নাহি সাধ আর এ সকলে !

৯

ফুরায়েছে সব সাধ নবীন যৌবনে,
 আশা-স্বথ দুখিনীর নাহি কিছু আর ;

ফুরাইবে এ যন্ত্রণা আর কত দিনে
 শুধু এই এক চিন্তা অন্তরে আমার।
 না হ'ত বিবাহ যদি আছিল সে ভাল,
 নাহি জানিতাম স্বামী কেমন রতন।
 আজন্ম কুমারী হয়ে শুখে চিরকাল,
 রহিতাম, দহিত না নিরাশায় মন।

১০

শর-বিদ্ধ বিহঙ্গিনী মর্শ্ব-বেদনায়,
 অস্থির যখন পড়ি লতার বিতানে।
 কে বুঝে কে দেখে তার তীব্র যন্ত্রণায়,
 লুটায় সাপটি পক্ষ একাকী কাননে।
 বিলাপে কানন-মাঝে যবে কুরঙ্গিনী,
 নিরখিয়া চতুর্দিকে মত্ত দাবানল
 কে বুঝে তখন তার কি করে পরাণি,
 কে মুছায় দুখিনীর নয়নের জল।

১১

“বারি, বারি” শব্দে করি কাতরে চীৎকার,
 নিদাঘ-চাতক যবে হতাশ অন্তরে
 পড়ে ভূমে চাপি বক্ষ, অন্তর কাহার
 কাঁদে অভাগিনী সেই চাতকের তরে?

অনন্ত সংসারে আমি সামান্য রমণী,
কোন্‌ দুঃখে কাঁদি সদা কে সন্ধান করে ?
সংসারে নারীর দুখ বুঝে কোন প্রাণী
মৃগ-তৃষ্ণিকায় কবে সলিল সঞ্চারে ?

১২

ঘুচাতে বেদনা যদি দুখিনী কন্যার
থাকে ইচ্ছা, এই ভিক্ষা জননী, অচিরে
জনমের মত আশা বিসর্জিয়া তার,
সাজাইয়া দেহ চিতা জাহ্নবীর তীরে ।
সজল নয়নে চাহি সংসারের পানে,
পশিব পরম স্নেহে জ্বলন্ত চিতায় ।
নিবিবে যখন বহি গিয়া সেই থানে
দেখিও বারেক তব দুখিনী কন্যায় ।

১৩

চিতার অনল সহ প্রাণের অনল,
দেখিবে নিবেছে সেই তরঙ্গিনী-তীরে ।
দুখিনীর এই মাত্র উপায় কেবল,
মুছাইতে অবিশ্রান্ত নয়নের নীরে ।
যত দিন বেঁচে রব এ পোড়া সংসারে,
সমভাবে এ যাতনা দহিবে অন্তরে ।

চাপাইয়া দেহ যদি বস্ত্র অলঙ্কারে,
তবু নিবিবে না বহিঃ স্পর্শের তরে ।

১৪

প্রাণের দোসর তুমি ভগিনী আমার,
কেন কঁাদি প্রতিক্ষণ জিজ্ঞাস আমারে,
কেন যে পরাণ কঁাদে উত্তর তাহার
কি দিব কথায় আজ সরলে তোমারে
স্বথ দুঃখ কোন্ সূত্রে নারীর জীবনে—
হয় অভিনিত, যদি বুঝিতে পারিতে,
বুঝিতে কি দুঃখ যদি হতাশের মনে,
কেন দুখী প্রতিক্ষণ নাহি জিজ্ঞাসিতে ।

১৫

পেয়েছ গুণের পতি মনের মতন,
নারীর অমূল্য নিধি পেয়েছ প্রণয় ;
তুমি কি বুঝিবে দিদি দুঃখিনীর মন ?
তুমি কি বুঝিবে তার কি করে হৃদয় ?
নির্বাক যাতনা মম ভগিনী তোমারে,
কেমনে বুঝাব বল,—চিরিয়া হৃদয়
দেখাইতে পারি যদি প্রাণের ভিতরে,
বুঝিবে তখন সদা কি যন্ত্রণা হয় ।

১৬

রুদ্ধ বিহঙ্গিনী-মত সংসার পিঞ্জরে,
 বসন ভূষণে মোরে তুষিছ সদত ;
 হায় রে মানস মম ভূলাবার তরে ;
 কিন্তু কেহ নাহি ভাব এ যন্ত্রণা কত ।
 অস্থি মাংস লোহ দেহে নাহি মম আর,
 চর্ম্মারত তুষানল গঠিত আকারে
 দহিয়া দহিয়া বহি জীবন আমার,
 পরিণত হবে শীঘ্র নির্জীব অঙ্গারে ।

১৭

কত অভাগিনী আমি স্ত্রুথের সংসারে,
 কি বলিব ভগ্না, এই পূর্ণ সপ্তদশ,
 নবীন বসন্ত মম হৃদয়-মাঝারে,
 কিন্তু হায় নিরাশায় সকলি নীরস ।
 যুবতী নারীর মন বুঝিবে আপনি,
 কত সাধ কত প্রেম নিয়ত উথলে ;
 কিন্তু মরুভূমে কবে ছোটো তরঙ্গিনী !
 শুকাইয়া যায় স্রোত উত্তপ্ত ভূতলে ।

১৮

নয়ন শ্রবণ মন তোমার মতন,
 সকলি আমার, কিন্তু প্রভেদ বিস্তর ।

স্বথের শৈশব আর দুঃখের যৌবন—

যেমন আমার ; স্বধু নেত্র-শোভাকর,
দেখি বটে সংসারের শোভা মনোহর ।

শুনি বটে মানবের সঙ্গীত মধুর,
হাসি বটে নিরখিয়া দৃশ্য হাস্যকর,
আশাও অন্তরে হায় করেছি প্রচুর ।

১৯

সকলি নীরস তাহে সে কুহক নাই,
তোমার অন্তরে যাহে আনন্দ উথলে,
আশায় নয়নে কর্ণে যাতনা যুড়াই
বিরলে আবার প্রাণ সেই রূপ জ্বলে,
মুছি নয়নের জল অন্তরে আপনি
নির্জন প্রাসাদে কিন্না গবাক্ষ-সদনে,
উপাধানে চাপি বক্ষ দিবস রজনী
যাপি যন্ত্রণায় আর হতাশ রোদনে !

২০

হেন চিত্রকর যদি থাকিত ভুবনে
হৃদয়ের প্রতিমূর্তি চিত্রিতে পারিত,
আশা তৃষ্ণা স্বথ দুঃখ মনের বেদনে,
তুলিকায় চিত্রপটে হইত অঙ্কিত !

দগ্ধ হৃদয়ের ছবি তুলিয়া তোমায়ে
 দেখাতেম সহোদরে যাতনা আমার,
 দেখিতে ছলিছে চিতা হৃদয়-মাঝারে,
 আশা স্থখ পরিবর্তে দেখিতে অঙ্গার ।

২১

আর তুমি চিরারাধ্য প্রাণেশ আমার !
 আসিও না কাছে মোর প্রেম সম্ভাষণে,
 হৃদয়ে লুকাও নাথ প্রণয় তোমার,
 কাজ নাই প্রকাশিয়া মধুর বচনে ।
 পত্নী আমি—দাসী আমি আজন্ম তোমার,
 অন্তরে পূজিব তব চরণ-যুগল,
 কিন্তু পুনঃ পরস্পরে মিলিব না আর,
 প্রজ্জ্বলিত হবে নাথ নির্বাপন অনল ।

২২

তুমি নহ অপরাধী, আমি অভাগিনী,
 হেরিলে তোমায় নাথ কাঁদে মম মন,
 নিরখি আপন চিতা মুমূর্ষু যেমনি
 বিষাদে হতাশে হায় মুদি ছনয়ন ।
 ক্ষম প্রাণেশ্বর ! এই নির্জুর বচন,
 ক্ষম দুখিনীর এই নয়নের জল,

পারি না লুকাতে আর মনের বেদন,
পারি না নিবাতে নাথ প্রাণের অনল ।

২৩

পঞ্চম বৎসর আজ বিষম যতনে,
লুকায়ে রেখেছি ব্যথা অন্তর-অন্তরে,
কেবল ঝরিত কভু নিশ্বাসে রোদনে,
ফুটি নাই দুঃখ মম একটি অক্ষরে ।
পারি না রাখিতে আর যাতনা অন্তরে,
পারি না বহিতে আর হতাশ জীবন,
ছেড়ে দাও যাই চলি কানন-ভিতরে,
চির-সন্ন্যাসিনী হয়ে করিগে রোদন ।”

২৪

অদীর্ঘ নিশ্বাস ত্যজি সোপান-উপরে
লুটায় পড়িল ধীরে নীরবে রমণী,
জুলিয়া উঠিল বুঝি যন্ত্রণা অন্তরে,
স্মরি জীবনের ঘোর দুখের কাহিনী ।
সেই চন্দ্রালোকে—সেই সরসীর তীরে—
বিষাদ-লুণ্ঠিতা সেই কামিনীর পাণে
দেখিলাম কতবার মুছি অশ্রুণীরে,
কতবার ক্লেশ তার ভাবিলাম মনে ।

২৫

জীবন আলেখ্য তার নয়ন দর্পণে
 হ'ল বিভাসিত মম, রেখায় রেখায়
 দেখিনু জ্বলন্ত শিখা ধায় মর্শ্ব-পানে,
 দন্ধ-আশা হত-স্বথ পড়ি শুষ্ক-প্রায় ।
 তখন সহস্র চিন্তা জাগিল অন্তরে,
 দেশাচার, শাস্ত্র, ধর্ম করিনু স্মরণ,
 কত তর্ক, ভাবিলাম দুখিনীর তরে,
 স্মরিয়া সমাজ পুনঃ ঝরিল নয়ন ।

২৬

স্বার্থ অন্বেষণে রত সবাই সংসারে,
 পর-দুখে কেবা করে অশ্রু বরিষণ !
 ধর্ম্যধর্ম্য, শাস্ত্রাশাস্ত্র, কেবল আচারে,
 অন্তরে ধার্মিক শাস্ত্রী নহে কোন জন ।
 দয়ার সাগর তুমি অনাথ সহায়,
 অটল বাসনা তব দেশের মঙ্গলে,
 সমাজে বক্তৃতা কর দেবতার প্রায়,
 সদাহিত শিক্ষা দাও বান্ধব-মণ্ডলে ।

২৭

তবে কেন আজ তব বধির শ্রবণ ?
 কেন নেত্রে নাহি আজ বিন্দু মাত্র জল ?

দুখিনীর হাহা রবে ফাটিছে গগণ
 কাঁদিতেছে তরুলতা সরসীর জল ;
 তুমি কেন শুষ্ক নেত্রে বসিয়া নীরবে ?
 নাহি চাও তার পানে নিঃস্বপ্নের প্রায় ?
 কাঁদে না কি মন তব দুখিনীর রবে ?
 অথবা কারুণ্য-লেশ নাহিক তাহার ?

২৮

তাই যদি, হায় তব কি পাষণ মন !
 মৃত তারা, কহে যারা হিতৈষী তোমাতে,
 যশের কিঙ্কর তুমি, দয়া প্রদর্শন
 কর অধু খ্যাতি-লোভে রাজ-দরবারে ।
 জানি আমি সমাজের কঠিন বন্ধন,
 জানি আমি প্রাচীনের নিঃস্বপ্ন আচার,
 কিন্তু নিরখিলে এই রমণী-রতন
 ইচ্ছা করে বিসর্জিতে পাপ দেশাচার ।

২৯

নিষ্ঠুর সংসার-স্থানে কি যাচিব আর,
 এই যাচি নরকূলে কে আছে এমন—
 কে আছে নারীর দুখে অন্তর যাহার
 ক্ষণেকের তরে হয় বিষাদে মগন ।

সুদূর কানন মাঝে নিরজন স্থানে
শান্ত নির্ঝরিনী-তীরে ভূধরের মূলে,
বেষ্টিয়া বিটপৌরাজি লতার বিতানে
নির্মাইয়া দেহ কুঞ্জ ঘন তরুদলে ।

৩০

ছুখিনীরে ছেড়ে দাও কুঞ্জের ভিতরে,
কাঁছক মনের সাধে দিবস-রজনী,
বাঁধিয়া চরণ আর রেখোনা উহারে
সুখের সংসারে করি চির অভাগিনী ।
ছেড়ে দাও এই দণ্ডে, ক্ষণেকের তরে,
রেখোনা উহারে আর করিয়া বন্ধন,
সহে কি এ ব্যথা তার কোমল অন্তরে
ছুখিনী রমণী বড় যতনের ধন ।

পুন্দরের দৌত্য । *

১

বিষম সমররাজ চিত্তোর সভায়
নীরব সচিব-বৃন্দ পারিষদ গণ,

*পৃথিবীরাজের সহিত সাহাব উদ্দীনের যুদ্ধ হইবার পূর্বে
পৃথিবীরাজ লাহোরাধিপতি পুন্দরকে দূত পদে বরণ করিয়া চিত্তো-

বজ্রনাদ অন্তে যথা সমুদ্র-হৃদয়,
 পুন্দর-বচনে স্তব্ধ সদসিভবন ।
 কহিল পুন্দর তেজে তুলিয়া উচ্ছ্বাস
 “যে জলদ রেখা, দেব, পশ্চিম গগনে
 উঠিছে ঈষৎ ভাবে, অনন্ত আকাশ
 আচ্ছন্ন হইবে তায় সহায় পবনে ।”

২

“যেই ক্ষীণ অগ্নিশিখা ভারত-ভবনে
 জ্বালিয়াছে জয়চন্দ্র, পরিণামে হয়—
 ভীষণ অনল হয়ে ছুটিবে সঘনে,
 হিমাঙ্গি-কুমারী ব্যাপি ভস্ম হবে তায় ।
 যদি কাল সর্পশির প্রবেশে বিবরে
 কার সাধ্য নিবারিতে সে ভূজঙ্গ-গতি ?
 পশে যদি ম্লেচ্ছ আজ ভারত ভিতরে
 কাল ভারতের ভাগ্যে অশেষ দুর্গতি ।”

রের অধীশ্বর সমরসাহীর নিকট প্রেরণ করেন । পুন্দর সমর-
 সাহীর নিকট যাহা বলিয়াছিলেন এ কবিতাটিতে তাহাই
 লিখিত হইল । চাঁদ কবির গ্রন্থে এ কথা সবিস্তার লিখিত
 আছে ।

৩

“বারেক খুলিয়া দেব স্মৃতির দুয়ার
ভারতের পূর্ব ছবি কর দরশন,
সৌভাগ্যের পূর্ণ জ্যোতি অঙ্গে চারিধার
কেমন অপূর্ব বেশ করেছে ধারণ ।
বীর্য, ধর্ম, শাস্ত্র আদি নক্ষত্র মণ্ডলে
কেমন শোভিছে, যেন শারদি-নিশায়
নিশানাথ বিরাজিছে তারকার দলে
উজলি ভারত-বন্ধ অতুল আভায় ।”

৪

“যশের পতাকা ওই উন্নত গগনে
কেমন উড়িছে দেখ শোভা বিকাশিয়া,
সূর্য্যতেজোময় সব আর্য্যসুত-গণে
চলেছে কেমন ভাবে গরবে মাতিয়া !
ভীষ্ম, কর্ণ, দ্রোণ, পার্থ, আচার্য্য-তনয়
এখনো নিরখি যেন সাজি রণ বেশে,
রণরঙ্গে মত্ত ভীম ভেদিয়া হৃদয়
হুঃশাসন-রক্ত পান করিতেছে রোষে ।”

৫

“হায় আর্য্যসুতগণ ! এত যে আয়াসে
তুলিলে যশের কেতু, বুঝি এতদিনে

খসিল ভূমতি তাহা স্লেচ্ছের পরশে ।
 অস্ত যায় স্তম্ভ সূর্য্য পশ্চিম গগনে ।
 একবার এস সবে কুরু-রণস্থলে,
 উত্তপ্ত মেদিনী তার কাতর তৃষ্ণায়,
 স্লেচ্ছ-রক্ত তরঙ্গিণী আনি কুতূহলে
 শীতল করহ তার উগ্র পিপাসায় ।”

৬

নীরব হইল দূত, স্তব্ধ সভাতল,
 চতুর্দিক একবার করিল ঈক্ষণ ;
 বদনে উৎসাহ-আভা নিরখি সবার
 কহিল আবার রোষে করিয়া গর্জ্জন
 “জীবিত কি আর্য্যসুত ভারত ভবনে
 উত্তপ্ত শোণিত কারো বহে কি শিরায়—
 ক্ষুব্ধ নহ কি স্লেচ্ছ পদ-প্রহরণে,
 ভারত-কলঙ্কে কারো কাঁপে কি হৃদয় ?”

৭

“কাঁপে যদি—ওই দেখ পশ্চিম গগনে
 ভারতের স্তম্ভ সূর্য্য রাহুর গরাসে ।
 আর্য্যকুল-মান যদি থাকে কার মনে
 কর যত্ন যাহে রাহু সূর্য্য না পরশে,

কাঁপে যদি—চল সবে সিঙ্কুনদ-কূলে
 ম্লেচ্ছের সমাধি-ক্ষেত্র করিবে খনন ।
 পরাধ্মুখ হও যদি, তরঙ্গিণী-জলে
 পশিয়া কলঙ্ক রাশি করো প্রক্ষালন ।”

৮

“পৃথু নহে ভীত একা যুঝিতে সমরে,
 কোন্ ক্ষত্র ভীত কবে সমর সজ্জায় ?
 একক শতক পৃথু ভাবে না অন্তরে,
 তবে কিনা জয়চন্দ্র সাহার সহায় ।
 ক্ষত্রিয়-কলঙ্ক জয় আর্য্য-কুলাঙ্গার
 যেই ইষ্টসিদ্ধি-আশে ম্লেচ্ছের সহায়,
 ভাসিবে উজান স্রোতে সেই ইষ্ট তার
 বুঝে না সর্পের গতি মুঢ় ছুরাশয় ।”

৯

“সুপবিত্র আর্য্য-ধাম জগত-পূজিত
 অশুচি ম্লেচ্ছের পদ পরশিবে তায়
 স্মরিলে বিদীর্ণ নহে কোন ক্ষত্র-চিত ?
 এ সন্মাদে অসি কভু পিধানে কি রয় ?
 গর্বেবর তিলক মুছি ললাট হইতে
 দাসত্ব কলঙ্ক তায় দিবে মাখাইয়া,

ছিঁড়িয়া স্বথের পদ্ম হৃদয় হইতে,
বিষাদ কণ্টক দামে সাজাইবে হিয়া !”

১০

“কি আর বলিব দেব, এই নিবেদন
পাঠাইলা পৃথু রাজ তব সন্নিধানে—
রক্ষিতে আৰ্য্যের মান আৰ্য্যস্বতগণ
মিলি রণক্ষেত্রে যেন যুঝে প্রাণপণে !
নীরব হইল দূত—গভীর বচন
হইল নীরব, কিন্তু প্রতিধ্বনি তার
ছুটিতে লাগিল করি জলদ নিশ্বন
সবার হৃদয়ময় বেগে অনিবার ।

১১

আঘাতি অনল ছটা কন্দরে কন্দরে
ভ্রমে যথা ক্ষণপ্রভা পৰ্ব্বত প্রদেশে,
তেমতি চিন্তার শিখা ক্ষত্রিয় অন্তরে
ভ্রমিতে লাগিল হেসে ভয়ঙ্কর বেশে,
কল্পনা অমনি আনি ভবিষ্যত ছবি
ধরিল মানস-পটে সন্মুখে সবার,
(অস্তমিত ভারতের সৌভাগ্যের রবি
নিবিড় গভীর মেঘে ভারত আঁধার) ।

১২

কহিল সমররাজ গম্ভীরে তখন—

“বুঝিনু এখন কেন স্বপ্নে অনিবার
হেরিতেছি কয়দিন সমর-প্রাঙ্গণ,
কেন থেকে থেকে কোষে কাঁপে তরবার ।
ভ্রমি গৃহমাঝে যবে অনুভব হয়
শরাসন দেখি মোরে উঠিল নাচিয়া,
যেন পদমূলে শব স্তম্ভপাকারে রয়
ভীষণ রক্তের স্রোত ছুটিছে বাহিয়া ।”

১৩

“অহো কি সম্বাদ আজ করিনু শ্রবণ”
নিরবিল ক্ষণে বীর ফেলি দীর্ঘশ্বাস ।
ক্ষণেকে চমকি পুন কহিল বচন
প্রারুটে গগনে যথা জলদ নিশ্বাস ।
“লাহোর-রাজন ! আজ করিলাম পণ
রক্ষিতে আর্যের মান যদি আর্য-সুত
নাহি বাঞ্ছে, একা আমি ভুতল গগন
ডুবাব সাগর-জলে ম্লেচ্ছের সহিত ।”

১৪

“এই দেখ”—বলি অসি করি নিষ্কাশন
ঝলসিল সভাতল উদ্ভিক্ত কিরণে ।

“এই দেখ এই অসি উলঙ্গ এমন,
 এমনি উলঙ্গ ভাবে রবে, যত দিনে,—
 পাপ মোচ্ছ-লোহ-নৌরে নাহি করে স্নান।
 সাধিতে এ আশা যদি বাদী বিশ্বজন—
 অথবা অমর-বৃন্দ,—নাহি পরিত্রাণ
 দ্বিধা হবে একঘাতে বিশ্ব ত্রিভুবন।”

১৫

“নক্ষত্রে নক্ষত্রে ধরি করিব প্রহার,
 চূর্ণ হবে সৌরদল পুড়িয়া অনলে,
 বাঁধিয়া ভারতে গলে সাগর মাঝার
 লুকাইব বারিধির স্নগভীর তলে।
 কলঙ্ক না স্পর্শে যাহে আর্যের ভবনে,
 অথবা নিম্নেচ্ছ পৃথ্বী করিব এবার
 স্তম্ভপাকারে রবে পড়ি সমর-প্রাঙ্গণে
 রাবণের চিতা সম মোচ্ছ-ভস্মসার।”

১৬

“যাও চলি—দিল্লীধামে কহ এ বারতা,
 মসৃণ করহ সবে ভল্ল খরশান,
 ভুলে যাও একবারে প্রাণের মমতা
 যত দিন এ অনল না হয় নির্বাণ।

যতদিন মেচ্ছ-রক্তে—স্বল্পদিন আর—
 শিক্ষিত না হয় বহু, মুহূর্তের তরে
 অলসে পলক যেন নাহি পড়ে কার,
 বাড়াও ক্রোধের ক্ষুধা আহারে বিহারে ।”

১৭

“অভিবাদন আমার দিও দিল্লীশ্বরে
 বোলো তাঁরে এ তরঙ্গ যদি সে তরঙ্গে—
 মিশে একবার,—ছার মেচ্ছ কলেবরে—
 ভাসাইব ভূমণ্ডল সমরের রঙ্গে ।”
 নীরব হইল রাজা স্তব্ধ সভাতল
 পড়ে না একটি শ্বাস নড়ে না পলক
 চামরী ব্যজন ভুলি দাঁড়ায়ে অচল
 নীরবে কৃপাণ স্কন্ধে স্তম্ভিত রক্ষক ।

—

অকস্মাৎ সে তারাটি ডুবিল কোথায় ।

১

জীবন সিন্ধুর তীরে বসি নিরন্তর
 হেরিতাম যে তারাটি অনন্য-মানসে,
 অকস্মাৎ কোথা গেল আঁধারি অম্বর !
 কাঁদিয়া উঠিছে প্রাণ চাহিয়া আকাশে ।

নহে কি সে নভঃ ইহা—সে নিশি কিঁ নয় ?

কিন্মা ইহা নহে সেই জীবনের তীর ?

সে আকাশে সে তারাটি সদত উদয়,

সে তীরে কিরণময় সদত যে নীর !

এ যে শূন্য নভস্তল, যামিনী আঁধার !

এ তীরে যে সিন্ধু-নীর ভীষণ আঁকার !

২

না না—সেই নভঃ ইহা, ওই চিহ্ন তার—

বজ্র ভাঙ্গা ঝুলিতেছে নীরদের গায়,

সেই নিশি বটে ইহা—তেমতি আঁধার,

তীরো সেই,—ভগ্ন কূল এই যে হেথায় ।

এই যে সে ছিন্ন লতা জীর্ণ তরু-মূলে

শুষ্ক পল্লবের রাশি এই যে এখানে,

ভগ্ন তরীখানি সেই ওই মগ্ন কূলে,

সে ভাঙ্গা পিঞ্জর খানি পড়ি এই খানে,

সেই নভঃ সেই নিশি, সিন্ধু তীরো সেই ।

কেন রে সে জ্যোতির্ময় তারকাটি নেই !

৩

নির্ম্মম সংসারে একা নিভৃত প্রান্তরে

জীবন সিন্ধুর তীরে ছিলাম বসিয়া,

স্নগ্ন ছিল চতুর্দিক নিবিড় অঁধারে,
 ছিল সেই এক তারা নিশি উজলিয়া,
 তখন জীবন নীর ছিলনা অধীর,
 শান্ত সাগরের মত আছিল নিথর,
 আজি অকস্মাৎ কেন এ বাত্যা গভীর
 কাঁদিয়া উঠিছে কেন প্রাণের ভিতর ?
 ওকি চিত্র ? সর্বনাশ—একি ভয়ঙ্কর !
 সে সুখ-তারাটি ওই গ্রাসিল পামর !

৪

চাহিনা দেখিতে আর লুকাও ছুরায়
 হা বিধাতঃ ! কি দেখালে নিবিড় অঁধারে !
 প্রকৃত এ চিত্র যদি, কেন অভাগায়—
 দেখাইলে, ছিল ভাল নিহিত অম্বরে ।
 ছিল ভাল সে নিবিড় অঁধার অম্বর
 ক্ষীণালোকে থাকিতাম পড়ি তরুতলে
 জড়াইয়া ছিন্ন লতা বন্ধের উপর ;
 হেরিতাম আজীবন আকাশের তলে ।
 কি দেখিনু—কি হইল প্রাণের ভিতর,
 ফাটে না অথচ যেন ফাটিছে অন্তর !

৫

জীবন আত্মার স্বপ্ন, প্রপঞ্চ বিধির
 অনিত্য, অসার স্বধু ভ্রান্ত লীলাময়,
 মুহূর্ত্তে মুহূর্ত্তে গতি যাহার অস্থির
 আবর্ত্তে আবর্ত্তে যার বিষম প্রলয় ;
 কেমনে বলিব তাহা স্থখের জীবন,
 কেমনে বলিব নহে ভ্রান্তমতি নর !
 কোন তর্কে বুঝাইব হৃদয় আপন,
 কি যুক্তিতে এ বিশ্বাস করিব অন্তর ?
 নিত্য, সার, সত্য, যার মুহূর্ত্তও নয়
 সে জীবনে নর-ভাগ্যে কি বা ফলোদয় ?

৬

“স্বথা জন্ম এ সংসারে” বলে না যে জন,
 বিপুল প্রয়াস তাঁর বাসনা গভীর,
 কীৰ্ত্তি যশ লালসায় আকুলিত মন,
 চঞ্চল জগতে তাঁর আত্মাও অধীর ।
 সুখী সেই—কিন্তু যার অঁধার জীবন,
 কিরণের রেখা মাত্র নাহি যে জীবনে,
 প্রতিপদে নিরাশায় দগ্ধ যার মন
 “মানব জনম সার” সে বলে কেমনে !

“উদ্দেশ্য সাধন কর” স্থখীর বচন,
 দুখীর আজন্ম স্মৃষ্টি করিতে রোদন ।

৭

উদ্দেশ্য—তাও কি এত স্মৃখদ জীবনে ?
 কি উদ্দেশ্য ? নরচিত্তে কি সাধ গভীর ?
 কীর্তি ?—গৌরব নিজ,—সে কীর্তি ঘোষণে
 কেন ক্ষুদ্রমতি নর সদত অধীর ?
 ধর্ম মোক্ষ কল্লনার সমষ্টি কেবল ।
 কিবা ধর্ম কোথা স্বর্গ কিবা দেহান্তর,
 অনিশ্চিত্তে কিসে এত বিশ্বাস প্রবল !
 অসম্ভব সত্যে কিসে এতই নির্ভর !
 কি বিচিত্র মানবের কুহক আশার !
 ধন্য মানবের মোহ—ধন্য ভ্রান্তি তার !

৮

ভ্রান্তি !—এ ভ্রান্তিতে জীব আচ্ছন্ন কেবল ।
 কেন এ ভ্রান্তিতে চিত্ত হইল মগন ?
 বিষাদের চিত্র কেন এত সমুজ্জ্বল,
 যন্ত্রণার রেখা কেন গভীর এমন ।
 ডুবিল—ডুবুক তারা, কেন ঝাঁদে মন ?
 শোক-দুখ-ক্ষীণ-বৃত্তি কেন এ হৃদয়ে ?

ছ

পুণ্ডলিকা রঙ্গভূমে জনম যখন
 নিয়তির অত্যাচার লঙ্ঘনীয় নহে,
 আত্মায় শরীরে যদি ক্ষণিক মিলন
 পার্থিব বিষাদে আত্মা কেন উচাটন !

৯

এইত যন্ত্রণা—চিত্ত সহজে দুর্বল ।
 মানস বুঝিলে তবু বুঝে না হৃদয়,
 শোকপ্রবণতা চিত্তে কেমনি প্রবল
 বিষাদে প্রবৃত্তি গুলি সব(ই) চিত্তময় ।
 যে দিকে ফিরাও মন চিত্ত সেই খানে ।
 শিক্ষার কঠিন জ্ঞান সেখানে নিষ্ফল,
 জাগ্রতে স্বপনে সেই ব্যথা বাজে প্রাণে ।
 প্রকাশিত পরিবর্তে হয় না শীতল ।
 কালের মন্থর গতি করি নিরীক্ষণ
 দন্ধচিত্তে বহ্নিশিখা করহ গোপন ।

১০

অনিত্য জীবনে কেন গভীর প্রণয় ?
 কেন এত স্নেহ মায়া নশ্বর জীবনে ?
 যুহুর্ভে যুহুর্ভে যদি এতই প্রলয়
 প্রণয়ের স্মৃতি কেন গভীর স্মরণে ?

স্মৃতি—কেন রহে চিন্তে এত দীর্ঘকাল !
 ঘটনার সঙ্গে ধ্বংশ কেন নাহি হয় !
 স্মৃতির ভাবনা হৃদে জাগে ক্ষণকাল,
 দুঃখের ভাবনা বিস্তৃত ভুলিবার নয়,
 যে অনলে দগ্ধ হয় পাষণ্ড হৃদয়
 সে অনলে স্মৃতি কেন ভস্ম নাহি হয় !

সুন্দর হইয়ে কেন হইল চপল ।

১

সুন্দর হইয়ে কেন হইল চপল ।
 বিদ্যুত মেঘের কোলে, আভাময়ী তনু ঢেলে,
 রহিতে পারিত যদি হয়ে অচঞ্চল ;
 সলিলের ধারা সনে ঝরিয়া পড়িত আলো
 কি সুন্দর বেশে তায় সাজিত ভূতলে !

২

সুন্দর হইয়ে কেন হইল চপল,
 ভূতল বিজুলি মম, ঐ সৌদামিনী সম,
 কভু ধীরে, কভু ছোটে, সদত চপল ;

ভাবিয়াছি কত দিন দেখিব নয়ন ভরি
চাহিলে অমনি মরি সরমে চপল ।

৩

কে দিল সরম ঢালি তাহার বদনে !
নয়নের দ্যুতি মম, কে শিখাল লুকাইতে ।
এ কুটিল ভাব হায় শিখিল কেমনে !
নবনীত করখানি যখনি ধরিতে যাই
অমনি ছুটিয়া ধায় আয়ত নয়নে ।

৪

সুন্দর হইয়ে কেন হইল চপল !
ছুইখানি কর ধরি, সবলে চাপিয়া বুকে
যখনি আদরে তার চুষেছি বদন ,
ছিন্ন করি আলিঙ্গন, বসনে বদন মুছি
বিদ্যুতের মত ছুটে করে পলায়ন ।

৫

সুন্দর হইয়ে কেন হইল চপল ।
যখনি আদর ভরে ডাকি প্রাণেশ্বরি বলি
বদনে বসনচাপি হাসে খল খল
সে ভাব নিরখি যদি বদন গম্ভীর করি
অমনি নয়ন প্রাপ্তে ঝরে অশ্রু জল ।

৬

সুন্দর হইয়ে কেন হইল চপল,
নিখর যৌবনাবেশে অঙ্গে অঙ্গে কত রূপ
উথলি উঠিছে,—যেন নির্ঝরের জল !
সে চারু বদনখানি, সে দুটি বৃহৎ আঁখি
সে দুই বক্ষিম ভুরু—কুঞ্চিত কুন্তল ।

৭

ভেবেছিছু উন্মাদিনী—তাহাও ত নয় ।
বিষন্ন বদনে যদি, হেরি কোন দিন তারে
কাষ্ঠ পুতলির মত দাঁড়াইয়া রয় ;
আবার হাসিয়া যদি ধরিতে প্রসারি বাহু
বিদ্যুতের মত পুন ছুটিয়া পলায় ।

৮

এও কি প্রণয় ! তবে হৃদয় আমার !
কি শিথিলে এত দিন ছাই ভস্ম গ্রন্থ পড়ি ?
অগ্নি কুণ্ডে ফেলে দাও লজিক তোমার ।
বালিকার এই প্রেম বুঝিতে নারিলে হয় !
কথায় কথায় কর সত্য আবিকার ।

৯

কিন্তু অচঞ্চল হয়ে চাহি মোর পানে
 প্রভাত-নলিনী মত বিকাশি কোমল তনু
 মাজিয়া তরল হাসি ইন্দু-নিভাননে
 দাঁড়াতে পারিত যদি, হইত কতই সুখ !
 সৃষ্টি ছাড়া প্রেম তার বুঝিব কেমনে !

১০

সে রূপ—এরূপ, রস ভাবি একবার
 হাসি মাখা সে বদন, লাজ পূর্ণ এ আনন,
 বিস্ফারিত সে নয়ন—এ আনত আঁখি ;
 নিখর সরসী তাহা, তীব্র নিষারিণী ইহা,
 বন বিহঙ্গিনী ইহা, তাহা পোষা পাখি !

১১

সে সরসী-কূলে বসি দেখিতে দেখিতে
 নয়নের ভ্রুণ মম শুখাইয়া যায় যদি,
 অথবা সরসী যদি নিদাঘে শুকায়,
 সে পাখি পিঞ্জরে বসি গাহিবে একটি গীত।
 নিতি নিতি নব গীত পাইবে কোথায় ।

১২

পূর্ণিমার চাঁদ তাহা,—এ চল দামিনী
সেরূপ কৌমুদি মত ঢালিবে শীতল জ্যোতি,
জড় চিত্তে বিমোহিয়া আঁধারে কেবল
জ্বলিয়া নিবিয়া কিন্তু এরূপ ছুটিবে প্রাণে,
কি আঁধারে কি আলোকে সদত উজ্জ্বল ।

১৩

সেরূপ—এরূপ—এ প্রভেদ বিস্তর !
পরিবর্ত নাহি চাই, থাক তুমি এই বেশে।
বুঝেছি বুঝেছি আমি প্রণয় তোমার।
কিন্তু পূর্ণ শশী মত, উদিকে নয়নে যবে
তুলিয়া নয়ন মোরে দেখো একবার ।

১৪

শিখিব বাসিতে ভাল স্তন্দরে চপল,
শিখিব এবার হতে যুড়াতে আশায় মন,
শিখিব মিটাতে সাধ নয়নে কেবল,
চঞ্চল দামিনী লতা, শিখিব বাঁধিতে বুকে ।
থেকো তুমি চিরকাল এমনি চপল ।

আশা তৃষ্ণা প্রাণেশ্বর কর বিসজ্জন।*

১

মুছিয়া নয়ন জল গবাক্ষ খুলিয়া
দেখিনু নবীন ভানু হাসিছে গগনে,
নিশার শিশিরে স্নাত, পাদপ লতিকা যত,
ছলিছে স্মন্দ ভাবে, প্রভাতি পবনে,
স্বশীতল ধরাতল উষার মিলনে।

২

নিবিড় তরুর তলে শ্যাম দুর্বাদলে
পড়িয়া শীতল ছায়া শান্তি-স্বরূপিনী,
বৃন্তে বৃন্তে ফুল গুলি, আনন্দে পড়েছে ঢলি,
অদূরে উঠিছে ধীরে মানবের ধ্বনি,
বোধ হইল যেন আজ নবীন ধরণী।

৩

দেখিনু শিশির বিন্দু গোলাপের দলে
কিরণে উজ্জ্বল হয়ে ঢল ঢল করে,
গোলাপ পড়িল হেলে, শিশির পড়িল ঝুলে,

* এরূপ কবিতা যে দুই একটি গ্রন্থ মধ্যে আছে গ্রন্থ-
কারের নিজের সহিত ইহাদের কোন সম্পর্ক নাই।

দেখিতে দেখিতে বিন্দু খসিয়া পড়িল,
সূক্ষ্ম রসে চারু পুষ্প নাচিয়া উঠিল ।

৪

সুন্দর রজনীগন্ধা ফুটিয়া শাখায়,
ভ্রমর নিষ্পন্দ-কায় বসিয়া তাহায়,
বাতাসে নড়িল শাখা, ভ্রমর খুলিয়া পাখা,
উড়ে বসে, ব'সে উড়ে, পুন উড়ে যায়,
স্থির হৈল শাখা অলি বসিল তাহায় ।

৫

উদ্যানের প্রান্ত ভাগে দেখিছু প্রাসাদ
নিদ্রিত যেন বা, সব রুদ্ধ বাতায়ন,
সৌধ-শিরে স্বর্ণপ্রভা, পড়েছে অরুণ আভা,
ক্ষুর চিন্তে স্থির দৃষ্টি হইল নয়ন,
ইষ্টকে ইষ্টকে যেন আকর্ষিল মন ।

৬

ছিল আশা এক দিন উহার ভিতরে
ওই কক্ষে ওই রুদ্ধ গবাক্ষ সদনে,
বক্ষে করে বাসন্তীরে, মুখচন্দ্র করে ধরে,
বলিব মনের স্তখে চুম্বিয়া বদনে,
কত আশা তার তরে জড়ায়েছি প্রাণে ।

৭

ছিল আশা একদিন পূর্ণিমা নিশিতে
 প্রিয়ার কোমল কর চাপি করতলে,
 ওই চারু পুষ্পোদ্যানে, বেড়াইব দুই জনে,
 তুলিয়া কুসুম রাশি প্রিয়ার অঞ্চলে,
 দুজনে গাঁথিব মালা বসি তরু তলে ।

৮

ছিল আশা—ওই ছাদে নীরব নিশিতে
 যামিনী নিস্তব্ধ হলে বসিব দুজনে,
 প্রেয়সী গাহিবে গান, শুনিয়া যুড়াব প্রাণ,
 কভু বা মিশায়ে গলা গাব দুই জনে,
 দুর্লভ সে স্মৃতি হায় বাঙ্গালি-জীবনে !

৯

ছিল আশা—বাতায়ন হইল মোচন,
 পল্যেক্ষে রমণী-মূর্তি !—চিনিবু কাহার,
 দ্রুত-তড়িদাম মত, শিরায় শোণিত স্রোত
 বহিল ছুটিল বেগে নয়ন আসার,
 অশ্রু-নেত্রে দেখিলাম বাসন্তী আমার ।

১০

বিষাদিনী বেশ—চূর্ণ আবদ্ধ কুন্তল,
 নয়ন সজল মুখ বিষাদ গম্ভীর,

চাপি বন্ধ উপাধানে, পূর্ণ দৃষ্টি শূন্যপানে,
 দুই বিন্দু অশ্রু দুই নেত্র কোলে স্থির
 পদ্য দলে যেন দুই বিলম্ব শিশির ।

১১

অকস্মাৎ বাহ্য জ্ঞান হৈল অন্তর্ধান,
 অকস্মাৎ মুক্ত হৈল হৃদয়ের দ্বার,
 অবস ইন্দ্রিয় চয়, হইল বাসন্তী-ময়,
 হইল সহসা মোহ জীবনে সঞ্চার,
 বাসন্তি ! বাসন্তি ! বলি করিনু চীৎকার ।

১২

ভাসি প্রাতঃ সমীরণে বাসন্তী অবগে
 প্রবেশিল সেই শব্দ—উঠিয়া ত্বরিত,
 দাঁড়ায়ে গবাক্ষ ধারে, নিরখিল অভাগারে,
 নেত্রে নেত্রে পরস্পরে হইলু বিম্বিত,
 ক্ষিপ্ত হৃদয়ের শ্রোত হইল স্তম্বিত !

১৩

সপ্তম বৎসর আজ দেশ দেশান্তরে
 হেরিয়াছি যেই মূর্তি প্রত্যেক স্মরণে,
 যমুনা যাহুবী জলে, শকটে বা বাষ্পকলে,
 স্মরিয়া যাহায় অশ্রু ঝরেছে নয়নে,
 সেই মূর্তি এক দৃষ্টে চাহি মোর পানে ।

১৪

সপ্তম বৎসর আজ যাহার কারণে
 ত্যজি গৃহ পরিজন ভ্রমি দেশান্তরে,
 জীব ধর্ম উদ্যাপন, করি আশা বিসর্জন,
 চিরদুখী উদাসীন আজ যার তরে,
 সেই মূর্তি দাঁড়াইয়া সম্মুখে অদূরে ।

১৫

তেমতি সরল দৃষ্টি শৈশবের মত
 কেবল যৌবনস্পর্শে অধিক উজ্জ্বল,
 অর্থশূন্য দরশন, লজ্জাশূন্য চন্দ্রানন,
 দেখিতে দেখিতে নেত্রে উথলিল জল,
 অপরূপ দুখে প্রাণ হইল চঞ্চল ।

১৬

বুঝে নাই প্রেম মম এখনো সরলে,
 বুঝিবে না এ জনমে নাহি প্রকাশিলে,
 হায়রে রমণী-মন, এত অন্ধ কি কারণ !
 বুঝে না প্রণয় কেন নাহি বুঝাইলে,
 ভাবে না ভাবনা নাহি প্রকাশ করিলে !

১৭

স্বপ্ন দিন হৈল গত দুইটি বৎসর,
 ভাবী দম্পতীর মত ছিলাম দুজনে,

সেই দীর্ঘ দিবৎসরে, কভু কি মুহূর্ত তরে,
উঠে নাই প্রেম চিন্তা বাসন্তীর মনে,
পতিভাবে ভাবে নাই কভু কি নির্জনে !

১৮

আশার একটি বর্ণ বলিনি তখন,
এই পরিণাম হবে কেই বা জানিত,
প্রেমপূর্ণ ছনয়নে, দেখিতাম চন্দ্রাননে,
জীবনের সুখ স্বপ্ন—কিন্তু কে ভাবিত
দশম বর্ষীয়া বালা অবোধ যে এত !

১৯

অথবা বিস্মৃতি, যদি তাহাই নিশ্চয়,
খুলিব না সরলার স্মৃতির দুয়ার,
আপনি কাঁদিব দুখে, বাসন্তী ত রবে সুখে,
সেই চিন্তা সুখময়ী হইবে অপার,
সরল অন্তরে ব্যথা দিব নাক তার ।

২০

কিন্তু কেন অশ্রুমুখী ? কি দুখ অন্তরে,
প্রেম যদি নয় তবে অশ্রু কেন ঝরে ?
রাজার নন্দিনী মত, ভুঞ্জে সুখ অবিরত
এত সুখে সুখী যেই, তাহার অন্তরে,
প্রেম-চিন্তা বিনা কোন দুখে অশ্রু ঝরে ?

২১

জিজ্ঞাসিব ভাবি পুন দেখিনু চাহিয়া,
 উথলিয়া পড়ে অশ্রু উজ্জ্বল নয়নে,
 অঞ্চলে মুছি নয়ন, রুদ্ধ কৈল বাতায়ন,
 মূৰ্খ আমি—প্রেম ইহা অন্তরে গোপনে
 গলিয়া গলিয়া আজ ঝরিল নয়নে ।

২২

রুদ্ধ গবাক্ষের পানে রহিনু চাহিয়া,
 ভাবিনু আবার মুক্ত হবে বাতায়ন,
 ছুটিল উন্মত্ত মন, করিবারে উদ্ঘাটন,
 নির্দয় কঠিন কাষ্ঠ একটু মোচন,
 হইল না দেখাইতে বাসন্তী-বদন ।

২৩

আবার সন্ধ্যাসী হ'ব বাসন্তীর তরে,
 এ জীবনে এ সংসারে ফিরিব না আর,
 বাসন্তীর মূর্তি গড়ে, নিরজনে বক্ষে করে,
 গোপনে কাঁদিব স্নেহে চুম্বি অনিবার,
 এ জীবনে বাসন্তী ত হবে না আমার !

২৪

ভাল বেসে থাক যদি দুখিনী সরলে,
 জনমের মত তবে হও বিস্মরণ,

বুঝেছি এ জন্মে আর, হইব না কেহ কার,
আশা মাত্র—চিন্তা মাত্র—অনন্ত জীবন,
আশা চিন্তা প্রাণেশ্বরির কর বিসর্জন ।

অকাল কোকিল ।

১

কে বলে নাহিক আর বঙ্গের ভবনে
মধুর নিনাদী পিক, নীরব সে ধ্বনি
কাঁদাইয়া গোড় জনে শ্রীমধু সূদনে
হরিল ভুবন-ত্রাস শমন যথনি ।
নগরের প্রান্তভাগে উন্নত বদনে
অই যে উল্লাসে পিক মধুর ঝঙ্কারে,
“ভারত সঙ্গীত”রাগ সুগম্ভীর তানে
“আর ঘুমাওনা” বলি জাগায় সবারে ।

২

কাব্য বিটপীর শাখে বসিয়া বিরলে
মরি কি মধুর স্বরে স্থললিত গায় !
কখন আনন্দ ভরে, কভু অশ্রুজলে
ঢালিয়া সঙ্গীত-শ্রোত জগত ভাসায়,

অকাল কোকিল আহা অযত্ন লালিত,
 স্বর্ণ পিঞ্জরে বদ্ধ বিটিশ-প্রাঙ্গণে,
 সভয়ে মনের ত্রাস না হয় স্ফুরিত
 না পারে ভ্রমিতে স্থখে সাহিত্য-কাননে ।

৩

আজ যদি সেই দিন হ'ত সে কানন
 বেদব্যাস কালিদাস বাণ্মিকী যেখানে
 অবোধে গাহিল গান পুরিয়া গগন,
 হিমাঙ্গি কুমারী ষুড়ি পুরিল নিকুণে ।
 কিন্না সেক্ষপীর যথা বিমোহন স্বরে
 ছুটাইল সঙ্গীতের তরঙ্গ প্রবল,
 বাইরণ্ মিলটন্ যথা স্বাধীন অন্তরে
 গাহিল ললিত স্বরে সঙ্গীত অমল,

৪

সে বসন্ত হ'ত যদি, হ'ত সে কানন,
 সে স্থখ তটিনী যদি রহিত হেথায়,
 চরণ শৃঙ্খল যদি হইত মোচন
 বুঝিতাম অই পাখি কি মধুর গায় ।
 অন্তরে মরম দুখ পরাণে যাতনা
 পরের প্রসাদ ভোজী অনার্য্য ভবনে,

ফুটালে ফুটেনা ত্রাসে মনের বাসনা
তুষিবে সবার মন সঙ্গীতে কেমনে !

৫

একবার খুলে দাও চরণ শৃঙ্খল
সাজাও তেমতি করে বঙ্গের ভবন,
ফুটাও তেমতি করে জাহ্নবীর জল
সেই রবি শশী শূন্যে করুক ভ্রমণ ।
শান্তির নিকুঞ্জ করি সন্তোষ লতায়
সরস বসন্তে ডাক করিয়া যতন,
তুলিয়া প্রমোদ কলি গাঁথিয়া মালায়
উল্লাস চন্দন তায় করিয়া লেপন—

৬

নিকুঞ্জের চারি ধারে দোলাও যতনে,
শুনিবে তখন পাখি কি মধুর স্বরে
গাহি স্থললিত গান হতাশা শ্রবণে
বর্ষিয়া পীযুষাসার তুষিবে অন্তরে ।
হায় রে সে সাধ পূর্ণ হবে কি কখন !
সরস বসন্তে কভু এ বঙ্গ ভিতরে
মাতায়ে আমার মন—মাতায়ে ভুবন
গাহিবে কি পিক আর বিমোহন স্বরে !

৭

হবে না সে সাধ পূর্ণ, শুনিব না আর
 পরাণ মাতান গীত কোকিলের স্বরে,
 গাও তুমি পিকবর তোমারি ঝঙ্কার
 শুনিব আনন্দ ভরে উল্লাস অন্তরে,
 নিরব এ বঙ্গে আজ তব কুহুস্বরে
 হাসিব কাঁদিব কিম্বা মাতিব হরষে,
 জাগে যদি আর্য্যাবর্ত—তোমারি ঝঙ্কারে
 সিন্ধু হতে ব্রহ্ম খত্র জাগিবে উল্লাসে।

৮

হৃদয়ের তুষানল নয়নের জলে
 নিবাসে আনন্দ মনে গাহ একবার,
 দুখী বঙ্গবাসী প্রাণে গীত রস ঢেলে
 শুষ্ক হৃদয়েতে কর সুধার সঞ্চার।
 বন্দী যথা রুদ্ধ বাসে নিবান্ধব পূরে
 স্বদূর কোকিল কণ্ঠে জুড়ায় যাতনা,
 তেমতি এ বঙ্গবাসী তব সুধাস্বরে
 ভুলিবে ঈষৎ ভাবে দাসত্ব যাতনা।

—

হৃদয়ে হৃদয়ে যদি সম্ভবে উত্তর ।*

১

হৃদয়ে হৃদয়ে যদি সম্ভবে উত্তর
 তবে কেন নাহি বুঝে সে আমার মন !
 হৃদয়ের তারে তার বাজিছে সঙ্গীত যার
 সে কেন বুঝে না তার একটি বচন !
 নীরবে চীৎকার করে, ডেকেছি অন্তর ভরে
 তথাপি তুলিয়া আঁখি দেখেনি কখন
 নীরব উত্তর হয়—প্রেমের স্বপন !

২

হৃদয়ে হৃদয়ে আর, নয়নে নয়নে
 হায়রে সম্ভব যদি হইত উত্তর
 সে অতুল রূপ রাশি, সে অমিয়মাখা হাসি
 হেরিলে ছুটিত আশা প্রাণের ভিতর ।
 উজ্জ্বল নয়নে তার, স্নানীল তারার পানে
 দেখিলে বিদ্যুৎ বেগে নাচিত অন্তর
 অমনি আদর করে, সঁপিয়াছি প্রাণ মন
 তবুত বুঝেনি তার একটি বচন

* গ্রন্থ মধ্যে এরূপ যে দুই একটি কবিতা আছে, গ্রন্থ-
 কারের সহিত তাহাদের কোন সম্পর্ক নাই । অন্যদীয় জীবনের
 ঘটনার সহিত সম্পর্ক থাকিতে পারে ।

৩

সে যদি বুঝেনা তবে কেন আশা তার ?
 “কেন আশা তার”—হায় হায়রে নিষ্ঠুর !
 ভাসায়ে দিয়েছি মন যে প্রেমের স্রোতে
 যেই প্রেমে আজ মম জীবন মরণ !
 তেয়াগি সংসার স্মৃথ, অন্তরে উদাসী হয়ে
 লুকায়ে অন্তরে যারে করি দরশন
 কোন্ প্রাণে আশা তার দিব বিসর্জন ?

৪

দিব বিসর্জন—কিন্তু কিছু দিন পরে
 নহে কিন্তু মধু মাখা প্রণয় তাহার
 অন্তরে অন্তরে যাহা, জীবনের স্রোতসহ
 বহিয়া বহিয়া আজি হইল অপার
 এ জীবনে সেই প্রেম শুকাবে না আর ।
 বারেক গোপনে তারে, বলিব প্রাণের দুঃখ
 তথাপি সে যদি নাহি হয় রে আমার,
 প্রাণ সহ বিসর্জিব ছরাশা তাহার ।

৫

নিষ্ঠুর ভাবনা কিন্তু ;—জাগ্রতে স্বপনে
 যেই শশী-মুখ খানি বাসিয়াছি ভাল

তুষিত চাতক মত, যার প্রেম আশ্বাদনে
 যন্ত্রণায় দন্ধ হয়ে ভ্রমিনু সংসারে,
 যে নিবিড় তনুখানি, নিরখি শিহরি প্রাণ
 ছুটিত উন্মত্ত হয়ে হৃদয়ে রাখিতে
 হেন মধুমাখা আশা হেন জীবনের স্মৃতি
 জনমের তরে কিরে হবে বিসর্জিতে !

৬

বিসর্জিতে হবে যদি দেখিলাম কেন ?
 দেখিলাম যদি—কেন বাসিলাম ভাল !
 না বুঝে হৃদয় তার, কেন প্রাণ আপানার
 দিলাম ভাসিয়ে তার রূপের প্রবাহে,
 এতই তরঙ্গ যদি বিরাজিছে তাহে ?
 বসন্ত মারুত মত, ছড়ায়ে যৌবন রাশি
 প্রণয়ের দেবীরূপে সম্মুখে যখন
 দাঁড়াইল, কেন নাহি মুদ্রিনু নয়ন !

৭

নিষ্ঠুর বিধাতা ! কেন খণ্ডিলে লিখন,
 স্মৃতির সম্বন্ধ সেই প্রেমের অঙ্কুর ?
 কেন ভাঙ্গি সে রতনে, সমর্পিলে অন্য জনে ?
 হায় রে সে যদি আজ হইত আমার !

বক্ষঃস্থলে রাখি তারে, দিবানিশি ছুনয়নে
 হেরিতাম শুধু তার রূপের ভাণ্ডার,
 ক্ষুধা তৃষ্ণা নিদ্রা ভুলি; শুধুই অলকা গুলি
 সরাসরে বদন খানি চুম্বিতাম তার !

৮

বলরে সমাজ তুমি উন্মাদ আমারে—
 পাপ দেশাচার তুমি কর তিরস্কার—
 বলিব চীৎকার করে, শুনুক জগত আজ
 পাপের সম্পর্ক নাই এ প্রেমে আমার ।
 পবিত্র অন্তরে তারে, কেন না বাসিব ভাল
 পাপ-শূন্য প্রেম হায় নাহি কি ভুবনে ?
 এ স্বর্গীয় প্রেম মম, বুঝিবে না এ সংসারে
 নিষ্ঠুর নরক সম সমাজ যেখানে ।

৯

কেন না বাসিব ভাল—কেন দেখিব না
 অতুল যে রূপখানি নিখিল ভুবনে ?
 সুন্দর গোলাপ মত, শুধু যদি দেখি তারে,
 নিষ্ঠুর সমাজ ! বল কি দোষ তাহায় ?
 সুন্দর রতন ভাবি, চুম্বিলে অধর তার
 বিকচ নলিনী ভাবি, রাখিলে হৃদয়ে

জুড়ায় হৃদয় যদি, কি ক্ষতি সমাজ তোর,
কি দোষ তাহাতে হয় বল না আমায় ?

১০

দেখিব—বাসিব ভাল জীবনে সতত
বিসর্জিব প্রাণ যদি হয় প্রয়োজন ;
কিন্তু দিনেকের তরে; হবে নাকি সে আমার
লভিব না কিরে তার একটি চুম্বন !
হৃদয় বিদীর্ণ হও, তাই যদি থাকে ভালে,
কেন যুগতৃষ্ণিকার কর অন্বেষণ !
দেখ রে জগত আজ, হৃদয় বিদীর্ণ করি
সহিয়াছি কত ব্যাথা তাহার কারণ ;

১১

সেও যদি বাসে ভাল—হায় রে দুরাশা !
সেও বাসিয়াছে ভাল—হায় রে স্বপন !
কেমনে বুঝিলে তুমি, সেও বাসিয়াছে ভাল ?
সেই দৃষ্টি ? সেই লজ্জা ? সেই সে বচন ?
সকলি সরল সে যে, কোথায় প্রণয় তার ?
তুমি ভাল বাস বলে, মধুর তেমন ।
বিশাল জগতে আজ কে আছে স্নহদ্ হেন
কে দিবে বলিয়া তার হৃদয় কেমন !

১২

এক দিন সঙ্গোপনে ডাকিয়া তাহায়
 আছাড়ি চরণে পড়ি, বলিব মনের দুঃখ ।
 কিন্তু সেই ভাষা হয় পাইব কোথায় ?
 কত দিন, কত বার বলিব বলিব ভাবি,
 হৃদয়ের কথাগুলি তুলেছি বদনে
 নিষ্ঠুর শরম হয় ! চাপিয়া ধরিত মুখ,
 মথিত হইত প্রাণ অন্তর বেদনে,
 তথাপি সে কথা হয় ফুটেনি বচনে ।

১৩

এস তবে শশধর নামিয়া ভূতলে,
 লিখেদিই তব অঙ্গে দুইটি চরণ,
 হেরিলে তোমার পানে, পড়িবে নয়নে তার
 প্রাণের লুকান কথা, বুঝিবে বেদন ।
 এস চিত্রপট, লিখি, তোমার চরণ তলে,
 এত অন্ধ কেন, হয় রমণীর মন ।
 হেরিবে যখন তোরে হয়ত বুঝিবে হয়
 কে লিখিল—কে কাঁদিল—তাহার কারণ ।

১৪

আবার আবার মন কেন সে ছুরাশা
 নহে তাহা ভাল বাসা—নহে তাহা প্রেম ।

কেন দুঃখী জিজ্ঞাসিত হৃদয় কোমল বলে ।

হৃদয় কোমল বলে করিত যতন ।

কিন্তু সেই দীর্ঘ শ্বাস ?—স্থির হও মন ।

তবে কি সে বাসে ভাল আমার মতন ?

সেই দীর্ঘ শ্বাসে কিন্তু হৃদয়ের সিন্ধু মম
করিয়াছে আকুলিত জন্মের মতন ।

১৫

“কেন দুঃখী ?”—হা হৃদয় ! পাষণ পরাণ

কেন না বিদৌর্গ হলি সম্মুখে তাহার,

কেন দুঃখী স্রবদনে ? বস তবে এই খানে,

কি দুঃখ আমার মনে বলিব এবার,

কোথা হতে এ অনল, বলিব কে দিল জ্বালি,

বারেক তাপিত বক্ষেঃ এস এক বার,

বারেক হৃদয়ে ধরি, বারেক চুম্বন করি,

দেখাব চিরিয়া প্রাণ কি দুঃখ আমার ।

১৬

কি দুঃখ আমার মনে বলিব তোমায়—

প্রকৃতি গম্ভীর হও, পবন নীরবে বও,

যামিনী আঁধার হও, ডোব শব্দধর,

নীরবে হৃদয়'পরে, চাপিয়া শ্রবণ তার

বারেক শয়ন কত মুহূর্তের তরে,
 হৃদয়ের তারে তারে বাজিছে দুঃখের গীত,
 শুনিবে এখনি, যুছু প্রতিধ্বনি তার,
 বুঝিবে জীবনে মোর সঙ্গীত কাহার

সমরসাহী-বিদায় ।

১

মধুর সায়েছে, প্রমোদ উদ্যানে,
 সরসী-সলিলে, সঙ্গিনীর সনে,
 স্ববর্ণ তরীতে, হরষিত চিতে,
 চিতোরের রাণী পৃথা বিহরে ।

২

হৃদয়ের হর্ষ বিকাশে নয়নে,
 চারু যুছু হাসি ফুটিছে বদনে,
 কুঞ্চিত কপোলে, যৌবন উথলে,
 রজতের দাঁড়, শোভিছে করে ।

৩

মত্ত হংসরাজ, গ্রীবা উচ্চ করি,
আসিছে সাঁতারি, পরশিতে তরী,
তরী বহি যায়, ধরিতে না পায়,
উঠে হাস্যধ্বনি, রমণী-মণ্ডলে ।

৪

হেন কালে আমি এক সহচরী,
কহিলেক উচ্চে আন কূলে তরী,
চিতোর-রাজন, রাজ্ঞী দরশন,
আশয়ে দাঁড়ায়ে, তরুর তলে ।

৫

চিতোর-রাজন !—বলি যুছু স্বরে,
তাজি দাঁড় পৃথা, দাঁড়াইল ধীরে,
সোপান তরীতে, নাহি পরশিতে,
হরিত চরণে উঠিল তীরে ।

৬

দূরে তরু-তলে, চাহি সরঃ পানে,
ভ্রমিছে সমর স্মন্দ চরণে,
বিষন্ন বদন, নিশ্প্রভ নয়ন,
জ্ঞান ভানু যেন অস্তের শিরে ।

৭

নিরখি সে বেশ হইয়া উতলা,
 প্রাপ্যেশের পাশে ছুটিলেক বালা,
 কুণ্ডল সঘনে, তুলিল পবনে,
 হেরিল সে বেশ রাজন ফিরে।

৮

“নাথ” বলি বক্ষে জড়ায়ে অমনি,
 তরুর শাখায় যেমতি ফণিনী,
 চাহি মুখ পানে, কাতর বচনে,
 জিজ্ঞাসিল কেন মলিন বেশ।

৯

চুম্বিয়া ললাটে, চুম্বিয়া নয়ন,
 বিষাদ, গম্ভীরে কহিল রাজন,
 “বুঝিবে কি পৃথ, কি ভাবনা চিতে,
 রমণী কি বুঝে বীরের ক্রেশ?”

১০

“নারীর হৃদয়, স্নধুই কোমল,
 প্রেম অভিমান অভিনয়-স্থল,
 সমর ভাবনা, প্রেয়সি জান না
 বুঝিবে না তুমি চিন্তা আমার।”

১১

“সঙ্গিনীর মনে, সরসী-সলিলে
ভাসি তরি’পরে বড় স্থখে ছিলে,
কায নাই শুনে, কি ভাবনা মনে,
চাহি না হরিতে স্থখ তোমার ।”

১২

“চাহ না হরিতে স্থখ আমার !
তবে কি হে নাথ, তবে কি আবার,
যাইবে যুঝিতে, ঘবনের সাথে,
তাই চিন্তাকুল সমর স্মরিছ !”

১৩

“কিন্তু নাথ আমি তোমার রমণী,
দিল্লী-অধিপতি, পৃথুর ভগিনী,
ছার শ্লেচ্ছরণে, রব তব মনে,
কি চিন্তা ?—আমি কি সমরে ডরি !”

১৪

“নিত্য তুমি যাও করিবারে রণ
নিরখিয়া আমি করিয়া যতন
শিখেছি সমর, দেখ প্রাণেশ্বর !
মম রঙ্গভূমি, কুঞ্জ ভিতরে ।”

১৫

“অসি যুদ্ধ করি প্রমীলার সনে,
শৈলবালা সাথে যুঝি ধনুর্বার্ণে,
স্বকোমল-কায়, ভেবোনা পৃথায়,
পৃথা আর নাহি ডরে সমরে ।”

১৬

“হাসিয়া রাজন প্রমোদের ছলে,
অঙ্গুলি প্রহারি স্বগোল কপোলে,
চারু কর ধরে, কহিল গভীরে,
যাব দিল্লীধামে এই নিশাতে ।”

১৭

“শিখেথাক রণ, হইয়াছে ভাল,
শিখ ভালকরে আর কিছু কাল,
যদি রণে পড়ি, তুমি অসি ধরি,
রক্ষিও চিতোর সঙ্গিনীসাথে ।”

১৮

“বিদায় প্রেয়সি ! দেহ আলিঙ্গন,
বাঁচি যদি রণে পাবে দরশন”
চুম্বিল কপোল, চুম্বিল কুণ্ডল,
চুম্বি ওষ্ঠ পুনঃ বলি “বিদায় ।”

১৯

ফিরায়ে নয়ন যেই অগ্রসর
অমনি ত্বরিতে ধরে পৃথা কর,
সজল নয়নে, চাহি ক্ষিতি পানে,
রহিল বিষাদে বিহ্বল প্রায় ।

২০

ক্ষণেকের পরে মুছি নেত্র নীরে,
ত্যজি দীর্ঘ শ্বাস বলে ধীরে ধীরে,
“কেন আজ হেন, কেঁদে ওঠে মন,
অশুভ ভাবনা কেন বা হয় !”

২১

“নহে নাথ আজ প্রথম বিদায়,
কত শত বার পাষাণীর প্রায়,
এই কর ধরে এই নেত্র নীরে,
দিয়াছি বিদায় ত্যজিয়া ভয় ।”

২২

“স্বহস্তে পরায়ে দিয়েছি বর্শ্মণ,
বাঁধিয়া দিয়েছি নিজে সারসন,
শিরে শিরস্ত্রাণ পৃষ্ঠে ধনুর্বাণ,
তখন ত এত কাঁদেনি মন ।”

২৩

“আজ কেন নাথ হেন অলক্ষণ !
পাষাণীর কেন ঝরিল নয়ন !
কে যেন অন্তরে, বলিতেছে ধীরে,
‘ভাঙ্গিল রমণী কপাল তোর ।’

২৪

“না না নাথ আজ একাকী-তোমারে,
দিব না যাইতে দুর্ব্বার সমরে,”
বলিয়া হ্রিতে কটিদেশ হ’তে
খুলিয়া লইল প্রথর অসি ।

২৫

বাম করে অসি করিয়া গ্রহণ
কহিল গম্ভীরে সমররাজন,
“এ কি ভাব পৃথি, এত ভয় চিতে,
এত ভীৰু আজ কেন প্রেয়সি ?”

২৬

“কোথা আজ তব সময়ের আশা ?
কোথা তব সেই তেজস্বিনী ভাষা ?
ভুলিলে সকল ? ছি ছি নেত্রে জল !”
মুছাইল নেত্র যতন করি ।

২৭

“নহে নাথ ইহা অমূল লক্ষণ”
বলি পৃথা ধীরে তুলিল নয়ন,
সরায়ে কুন্তল, মুছি নেত্র-জল,
গ্রীবা উচ্চ করি দাঁড়াল সরি।

২৮

“অমূল এ ভয় নহে কদাচন,
অকারণে বক্ষ কাঁপেনি কখন”
প্রাণেশের কর রাখি বক্ষোপর
“দেখ নাথ হৃদি সঘনে কাঁপে।”

২৯

“নারী আমি— কিন্তু হৃদয় আমার
নহে প্রাণেশ্বর ! শিশু বালিকার,
শত শত বার, কঠিন প্রহার,
সহেছি কখন তবু না তাপে।”

৩০

“দেখেছি দাঁড়ায়ে প্রাসাদ-শিখরে
রণ-বেশে তোমা অশ্বের উপরে,
পাশ্বে শত্রু দল, করে কোলাহল,
তবু তিল মাত্র কাঁদেনি মন।”

৩১

“কোথা দিল্লী কোথা চিত্তোর নগর !
কোথায় যবন কবে বা সমর !
আজ অকস্মাৎ, কেন প্রাণনাথ ?
বালিকার মত ঝরে নয়ন ?”

৩২

“নিষেধ করি না করিতে গমন,
যাও প্রাণেশ্বর কর জয় রণ ।
কিন্তু যে বিষাদে, আজ প্রাণ কাঁদে,
ছুখিনীর ভালে যদি তা ফলে”—

৩৩

“জনমের মত হ’ল উদ্যাপন
জীবনের ত্রুত, শেষ দরশন,
কিন্তু ভেবো মনে, রণে প্রতিক্ষণে,
ছুখিনীরে এই নয়ন-জলে ।”

৩৪

“কি বলিব আর ক্ষত্রিয়-রমণী
কি বলিবে নাথ সহজে পাষাণী ;
অন্তর পুড়িবে নয়ন ঝরিবে,
নাহি নিষেধিবে পতির রণে ।”

৩৫

মস্তকের কেশ করিয়া ছেদন,
 ক্লপাণের গলে করিয়া বন্ধন ;
 “এই চিহ্ন নাথ লহ তব শাখ,
 আর যত চিহ্ন রহিল মনে !”

৩৬

“নারীধন্য ভূমি” বলিয়া রাজন,
 বাম করে অসি করিয়া গ্রহণ
 স্থরিত চরণে, চলিল তোরণে,
 পৃথার অমনি ঝরিল আঁখি ।

৩৭

দৃষ্টির অতীত হইলে রাজন,
 ত্যজি শ্বাস পৃথা তুলিল নয়ন,
 বসি জানু’পর, যুড়ি ছুই কর,
 চাহি উর্দ্ধ পানে কহিল ডাকি—

৩৮

“হে অনাথনাথ ! কেন কাঁদে মন ?
 দুখিনীর ভাগ্যে কি আছে লিখন !
 কেন অমঙ্গল, ভাবনা কেবল ?
 উথলিছে আজ হৃদয়ে মম !”

৩৯

“হ্রস্বল করিয়া গঠিলে রমণী,
পুনঃ দুঃখ দিতে বীরের পতিনী,
ঢালিয়া প্রণয়, গঠিলে হৃদয়,
পাষণের বক্ষে কমল সম ।”

৪০

“শিখাইলে নাথ স্নধু ভাল বাসা
পতির মোহাগ স্নধু এক আশা,
মিলনে হাসিতে, বিরহে কাঁদিতে,
কন্দুক-বিলাসী শিশুর মত ।”

৪১

“শিখায়েছ যাহা শিখেছি যতনে,
ঢেলেছি হৃদয় পতির চরণে,
জীবন সম্বল, পতিই কেবল,
তবে কোন্ দোষে যাতনা এত ?”

৪২

“রমণী-হৃদয় সৃজিত তোমার,
কিন্তু নাথ তুমি যাতনা তাহার,
পার না বুঝিতে, পাও না দেখিতে,
নারীর যাতনা বিষম কত ।”

৪৩

“সাগরের বক্ষ গিরির গহ্বর,
নহে নাথ এত নিভৃত প্রান্তর—
ভীষণ শ্মশান, আরণ্য বিতান,
নহে এত শূন্য—এ প্রাণ যত ।”

৪৪

“এত ক্ষুদ্র কিন্তু বিশাল এমন,
কোমল অথচ ইহার মতন
দারুণ কঠিন, দারুণ প্ররীণ,
স্বজিয়াছ কিবা জগতে আর ।”

৪৫

“বল জগদীশ জীব-লীলা-স্থলে,
কাঁদিতে কি অধু রমণী স্বজিলে ?
আশা-পূর্ণ মন, করিয়া স্বজন,
সহিষ্ণুতা শিক্ষা অধুই তার !”

৪৬

সহসা হ্রিতে মুছিয়া নয়ন
দাঁড়াইল পৃথা বিস্ফারি লোচন,
আবদ্ধ কুন্তল, আরক্ত কপোল,
উন্নত উরসে স্থলিত বাস ।

৪৭

স্থল-কমলিনী উন্নত শাখায়,
 প্রভায় ভানুর কাঞ্চন আভায়,
 শোভিয়া যেমন, নিরখে গগণ,
 উছলিয়া দলে ভানুর আস ।

৪৮

নিরখি তোরণ কহিল গম্ভীরে
 “ধীরের প্রতিজ্ঞা কখন কি ছিঁড়ে ?
 রে অশান্ত মন, ভ্রান্ত কি কারণ,
 কবে দেখিয়াছ ফিরিতে তাঁয় !”

৪৯

“কে বলে দুশ্ছেদ্য নারীর প্রণয়,
 নাহি বাঁধে যদি ধীরের হৃদয়,
 (পুরুষ ত সেই, রণ-প্রিয় যেই,
 বীর বনা প্রেম শোভয়ে কায় ?)”

৫০

“অথবা প্রণয় দুর্বল আমার,
 নাহি শক্তি হৃদি বাঁধিতে তাঁহার,
 কিবা সে প্রণয়, বীর বদ্ধ যায়,
 কি স্থখী সে নারী জানে যে তাহা ।”

৫১

“ফিরিলে এ বার প্রাণেশ আমার
শিখিব বাঁধিতে হৃদয় তাঁহার
হাব ভাব হাসি সঙ্গীত বা বাঁশী
শিখিব তাঁহার বাসনা যাহা ।”

প্রেম-প্রপাত ।

১

কৈ প্রিয়ে নিবিল না মনের বেদনা !
ভেবেছিছু অদর্শনে, ভুলিব সে আলিঙ্গনে,
ভুলিব সে বিদায়ের প্রগাঢ় চুম্বন,
নিবিবে এ বিরহের প্রচণ্ড দহন ।

২

নিবিল না প্রিয়তমে দারুণ যাতনা,
যতক্ষণ রহে জ্ঞান, নাহি হয় অবসান,
পাষণ—তাই ত হৃদে দ্বিগুণ বেদনা ;
পাষণে যাতনা কত সরলা বুঝে না ।

৩

পাষণ না হ'ত যদি পুরুষের মন
য অনল পক্ষে জ্বলে ভস্ম হ'ত কোন কালে,
পাষণে অনল দিলে উত্তাপে কেবল
দ্রোবে না পোড়ে না স্খু উত্তাপে প্রবল ।

৪

পাষণ হইত যদি তোমার ও মন
বুঝিতে যন্ত্রণা কত, দন্ধ হ'য়ে অবিরত,
দুই বিন্দু অশ্রু ঝরে মনের দেবনা ?—
পাষণ অন্তরে প্রিয়ে কখন নিবে না ।

৫

যে অনল জ্বলে গেছ প্রেয়সি অন্তরে,
দিবা নাই, রাত্রি নাই, দণ্ড নাই পল নাই,
জ্বলিতেছে অবিরল স্খু ধু ধু করে,
নিবে না প্রাণের জ্বালা মুহূর্তের তরে ।

৬

আমারি নয়নে কিম্বা প্রকৃতির গায়,
রূপের চরম নিয়ে, প্রেমের পীযুষ দিয়ে,
অঙ্কিত করেছে কেহ আলেখ্য তোমার,
নিরখি প্রেয়সি তোরে তাই অনিবার ;

৭

ফুলে ফলে শূন্যে জলে দেখি যেই খানে,
জড়ায়ে আমার বক্ষে, ছল ছল দুই চক্ষে,
চেয়ে ছিলে মোর পানে বিদায়ের দিনে,
জীবন্ত সে মূর্তি আমি নিরখি নয়নে ।

৮

সেই মূর্তি—সেই স্থখ—স্বর্গ ধরাতলে ।
যে আছ সন্ন্যাসী কূলে, বারেক নৈরাশ্য ভূলে,
একবার দৃষ্টি তুলে কর দরশন,
সংসারে নন্দনবন প্রিয়ার বদন !

৯

আর তুমি হে উদাসি ! মুছি অশ্রু জল,
মনের মালিন্য ভূলে, দেখ দেখি নেত্র ভূলে
বারেক প্রণয় ভরে প্রিয়ার বদন,
কাল রূপে তোষে কত তোমার ও মন ।

১০

সংসারে নন্দনবন প্রিয়ার বদন,
কোথায় নন্দন আজ—কোথায় অমর রাজ !
কোথা তুমি কোথা আমি, প্রেয়সি আমার !
চারি দিক শূন্যময় মরু পারাবার ।

১১

কি বুঝিবে কত ব্যথা আমার অন্তরে,
সেই আমি, সেই স্থান, সেই আঁখি সেই প্রাণ,
সেই নিশি সেই শশী এ শয়নো সেই
সকলি তেমতি কিন্তু সে আনন্দ নেই !

১২

এই স্থানে—হেরি যেন প্রত্যক্ষ নয়নে,
কত দিন প্রেম ভরে, চুম্বিয়াছি বিশ্বাধরে ;
হাসিয়ে অঞ্জলি চাপি ঢাকিতে বদন,
মুগ্ধ নেত্রে হেরিতাম পূর্ণ চন্দ্রানন ।

১৩

বলে ছিলে এক দিন আছে কি স্মরণ ?
“হ’তেম বিহঙ্গ যদি, দুই জনে নিরবধি,
উড়িয়ে মেঘের কোলে স্থখে ভ্রমিতাম,
নদ নদী বন গিরি কত দেখিতাম ।”

১৪

চাহি না বিহঙ্গ হ’য়ে উড়িতে গগণে,
পতঙ্গ হতেম যদি, লজ্জিয়া এ ক্ষুদ্র নদী,
বারেক প্রেয়সি তোরে বুকে করিতাম,
এ ঘোর যাতনা ভুলি স্থখে রহিতাম ।

১৫

বুঝিলে কি প্রিয়তমে মনের বেদনা ?
শুষ্ক হেরি এ নয়ন, ভেবেছ পাষণ মন,
তরল হইত যদি বেদনা আমার,
হইত নয়ন জলে কত পারাবার ।

১৬

বালিকা এ প্রেম তুমি বুঝিতে নারিবে,
সিন্ধুর পরিধি আছে, গগণেরও অন্ত আছে,
কালের অনন্ত সীমা হয় নিরূপন ;
অনন্ত এ প্রেম মম বিশ্বে অতুলন ।

সায়হু-চিন্তা ।

১

নিদাঘ সায়হু দূর নয়ন সীমায়
স্পর্শিয়াছে যেই থানে আকাশ ভূতল,
অস্তমিত ভানু আভা মিশাইয়া যায়
বিকাশিছে গোধূলির ছায়া স্রশীতল ।
সেবিতে ছিলাম বায়ু প্রাসাদ শিখরে
গালিচায় বিস্তারিয়া ক্লান্ত কলেবর,

ভার্জিলের গ্রন্থখানি বন্ধের উপরে,
ভাবিতে ছিলাম ক্রীম ট্রোজন সমর ।

২

মানব চিত্তের গতি বিচিত্র কেমন !
দেখিতে দেখিতে শূন্য স্তনীল অন্ধরে
লজিয়া জলধি সীমা অনন্ত যোজন,
প্রবেশিল ট্রয়-রাজ্যে মুহূর্ত্ত ভিতরে ।
আবার মুহূর্ত্ত নাহি হইতে অতীত,
ফিরিল ভারতবর্ষে বিদ্যুত গমনে ।
চক্ষের পলক নাহি হইতে পতিত
অবনীর দুই প্রান্ত হেরিল নয়নে ।

৩

ভারতের চিত্রপট সম্মুখে এখন—
স্থির চিত্তে দেখিলাম কতক্ষণ ধরে,
যে ট্রয় দেখিয়া এত বিস্ময়ে মগন
সেই ট্রয় দেখিলাম নগরে নগরে ।
যে বীরত্বে হেক্টর আছিল দুর্জয়,
সে বীরত্ব কুরুক্ষেত্রে রাশিকৃত পড়ে,
যে রূপের তরে ভস্ম হয়েছিল ট্রয়
সে সৌন্দর্য ভারতের কুটিরে কুটিরে ।

৪

কুরুক্ষেত্র—ভারতের বীরের শ্মশান !
 বিঘত প্রমান ভূমি করহ খনন
 কত ভগ্নধনু কত রক্তাক্ত রূপাণ—
 দেখিবে কতই ভগ্ন বিচিত্র কেতন ।
 আর কি দেখিবে ?—হায় বিদরে হৃদয় !
 হয় ত দেখিবে চূর্ণ অস্থি কয় খান,
 যে বিরহ ভ্রমণ্ডলে আছিল দুৰ্জয়,
 চূর্ণ অস্থি মাত্র তার দেখিবে প্রমাণ ।

৫

তথাপি বিলাত শ্রেষ্ঠ—বঙ্গের সম্ভান !
 কে দিল এ মোহমন্ত্র তোমার শ্রবণে ?
 মন-চক্ষে দেখ দেখি চিত্র দুইখান
 কোন চিত্র রম্যতর উদিকে নয়নে ।
 বীরত্ব, সৌন্দর্য্য, কিস্বা সাহিত্য, প্রণয়,
 পরস্পরে মিলাইয়া দেখ একবার,
 ভারতের কোন বস্তু হীনপ্রভ হয়,
 ভারতবর্ষেতে নাই কোন্টি ইহার ?

৬

নাহি সে পিণাকধারী কর্ণ ধনঞ্জয়,
 নাহি ভীম অভিমন্যু, নাহি গুরু দ্রোণ,
 অপভ্রংশ আর্য্যবংশ তবু লুপ্ত নয়—
 ভারতে ক্ষত্রিয় জাতি জীবিত এখন(ও) ।
 পরিচয় দিতে লিপি সরমে সিঁহরে,
 আর্য্যবংশ অবতংস যে ক্ষত্রিয়গণ,

* * * * *
 * * * * *

৭

তথাপি সে আর্য্যজাতি—গর্ব আপনার—
 ভুলে নাই, ক্ষীণগতি ধমনী ভিতরে
 আর্য্যের শোণিত স্রোত ছুটিছে তাহার—
 সত্য ধর্ম্ম দৃঢ়ত্বত এখনো অন্তরে ।
 একটি য়ুনানী বীর ক্ষত্র এক জন
 দেখ দেখি কিছুক্ষণ নিবিষ্ট অন্তরে,
 কাহায় বিরাজে উচ্চ বীরত্ব লক্ষণ
 তেজ, বীর্য্য ; ধর্ম্ম-চিহ্ন আছে কোন নরে ।

৮

পুরুষ অন্তরে থাক্, যেখানে রমণী
কৌতুক ভাবিয়া হাসি পশিত সমরে,
কোমল হৃদয়ে ভগ্ন হইত অশনি
তথাপি করিত রণ স্বদেশের তরে ।
যদি নিজ পতি কভু ভঙ্গ দিত রণে,
কাপুরুষ ভাবি তায় হেরিত না মুখ ।
রণে ভীত পুত্র যদি ফিরিত ভবনে,
কাটিত নিস্তেজ ভাবি স্বীয় স্তনযুগ ।

৯

সৌন্দর্য—তাই বা কোথা ভারতে যেমন,—
এমন নিবিড় তনু কোথা ভূমণ্ডলে ?
এমন বক্ষিম ভুরু—বিস্তৃত নয়ন,
এমন বলিব কিবা—আছে কি ভূতলে ?
এমন অনন্ত বাহী প্রেম-প্রবাহিনী !
নিস্বার্থ অনন্ত হেন চিত্ত বিনিময় !
প্রণয়ে রমণী—স্নেহে স্বরূপা জননী,
স্বধু ইউরোপে কেন—নাহিক ধরায় ।

১০

শ্বেতান্ধী মহিলা মত চঞ্চলা সাদিনী
অসার আমোদ-মত্তা পাবে না এখানে,

প্রেম, রূপ শোভে যাহে ভারত-রমণী,
 পবিত্র প্রকৃত তাহা স্নগভীর প্রাণে।
 প্রেমে আলিঙ্গন দিবে, সমরে সাদিনী,
 সঙ্গিতে ঢালিবে স্নধা, আমোদে রঙ্গিনী,
 সাহিত্যে হইবে সখী, সংসারে গৃহিণী,
 বিপদে হইবে দাসী মরণে সঙ্গিনী।

১১

সাহিত্য বিলুপ্ত-প্রায় তথাপি এখানে
 ছিন্ন বস্ত্র বিমণ্ডিত তালের পাতায়,
 যে কবিত্ব যে পাণ্ডিত্য পড়ে অযতনে,
 (ই)উরোপে নাহিক তাহা রয়েল ফর্ন্মায়।
 তাপস বালিকী বসি পর্ণের কুটিরে,
 যে কবিত্ব শ্রোত হায় করেছে স্রজন,
 আভ্যুতোর* উচ্চতর প্রাসাদ শিখরে
 হয় নাই—হইবে না কভু সে কুজন।

১২

তবু কি বিলাত শ্রেষ্ঠ?—বঙ্গের নন্দন
 এখনো যদ্যপি তব ভ্রম নহে দূর—

* Stratford-on-Avon, birth-place of Shakspeare.

নহ দোষী তুমি, তব কলঙ্কী নয়ন,
 সাধ্য-হীন নিরখিতে দৃশ্য স্মধুর ।
 বিলাতী শিক্ষায় কিন্না হৃদয় তোমার,
 বিকৃত বিলাতী ছাঁচে হয়েছে গঠিত,
 অসনে বসনে ওই লক্ষণ তাহার,
 উচ্চ বংশোদ্ভব, কিন্তু শিক্ষায় ঘণিত ।

এক খানি চিত্র-পট দর্শনে

১

অবিকল মূর্তিখানি ! সুন্দর অঙ্কিত !
 সৌন্দর্য্য সকলি তার হয়েছে চিত্রিত ।
 এমনি সুন্দর বটে তাহার বদন !
 এমনি বিস্তৃত বটে তাহার নয়ন !
 এমনি গম্ভীর বটে প্রকৃতি তাহার !
 তাহার ঈষৎ হাসি এমনি সুধার !
 গ্রন্থ হাতে রূপ তার এমনি সুন্দর !
 ঠিক যেন সেই এই, ধন্য চিত্রকর !
 স্ফটানা নয়ন দুটি অর্ধ নিমিলিত,
 বক্ষিম নিবিড় কেশে অয়ুগ শোভিত ।

অনতি-প্রশস্ত ভাল, চম্পক উজ্জ্বল,
 কালিম তরঙ্গে তায় শোভিছে কুন্তল ।
 সূক্ষ্মশ্বেত রেখা সিঁথি, অতি সাবধানে
 বিভাগি স্মৃগু কেশ অঙ্কিত যতনে ।
 স্বর্ণ মাকড়ি কর্ণে হীরক উজ্জ্বল,
 পড়িয়ে নিটোল গণ্ডে চমকে চঞ্চল ।
 সুন্দর নাসিকারন্ধ্রে নোলক অচল,
 ওষ্ঠাধর সূক্ষ্ম রেখা প্রেভেদে কেবল ।
 সেই অঙ্গ সে বরণ, সেই ভাব সে গঠন,
 সজীব প্রতিমা যেন সন্মুখে আমার ।
 চিত্রপটে সব রয় কেবল চেতন নয়
 চিত্রণের এ অভাব বড় অত্যাচার !
 ২
 দেখিব না—দেখি যদি স্মৃহুই দেখিব ;
 এবার মানস মম টলিতে না দিব ।
 দগ্ধ করি চিত্রপট জ্বলন্ত অনলে,
 বিসর্জিব স্মৃতিচিহ্ন বিস্মৃতির জলে ।
 ভাবিব না !—চিত্ত বড় অবস এখন,
 ভাবিলে তাহায় স্মৃ হইবে স্মরণ ।
 দিবারাত্রি অন্য মনে রব জাগরণে,
 নিদ্রায় তাহারে পাছে নিরখি স্বপনে ।

কাব্য উপাখ্যান পুন পড়িব না আর ;
 পাতায় পাতায় প্রেম জাগিবে তাহার ।
 সকলি হইল—কিন্তু প্রাণের ভিতরে—
 আশার সমুদ্রে বল নিবারি কি করে !
 নবীন বয়সে হায় তাপস কজন !
 আপনার বশ বল কজন্যার মন !
 যেখানে আঁখির তৃপ্তি, বাসনা সেথায়,
 যেখানে বাসনা, আঁখি অতৃপ্ত সেথায় ।
 ছুই যন্ত্রণার—তবু প্রত্যেক অন্তরে
 স্বভাবের হেন ভাব কিহেতু বিহরে ?
 যেখানে গভীর ব্যথা, কেন চিত্ত ধায় সেথা,
 ছল'ভ রতনে কেন এত প্রলোভন ।
 যেখানে নৈরাশ্য যত, সেখানে বাসনা তত,
 মানবের হেন মোহ কিসের কারণ ?
 ৩
 সংসারের পরিবর্ত দেখি সৰ্ব্ব ঠাই,
 হতাশ হৃদয়ে কেন পরিবর্ত নাই !
 শুষ্ক তরু-মূলে কর সলিল সিঞ্চন,
 শাখায় শাখায় তার ধরিবে প্রসূন ।
 অতি জীর্ণ অট্টালিকা করহ সংস্কার,
 তাহাও মোহিনী মূর্তি ধরিবে আবার ।

শুষ্ক সরসীর পঙ্ক করহ উদ্ধার,
 কুমুদ কমল তায় ফুটিবে আবার ।
 মুমূর্ষে করাও যদি ঔষধ সেবন,
 কালেতে সবল-দেহ হইবে সে পুন ।
 সংসারে যা কিছু ভাঙ্গা জোড়া যদি দাও,
 আবার পূর্বের মত দেখিবারে পাও ।
 ভগ্ন হৃদয়ের কেন পরিবর্ত নাই,
 যা গিয়াছে তাহা কেন ফিরিয়া না পাই ।
 চাহি না পার্থিব সুখ—চাহি না প্রণয়,
 চাহি শুধু আমার সে প্রশান্ত হৃদয় ।
 হারায়েছি যেই মন, নাহি চাহি আর,
 ফিরে যদি পাইঁ সেই সন্তোষ আমার ।
 এ যে চিত্ত মরুময়, নিশ্বাস ঝটিকা বয়,
 পলকে পলকে হয় বিষাদে চঞ্চল
 মুদিয়াছি হু নয়ন, তবু হয় উদ্দীপন,
 স্মৃতির শলাকা পর্শে প্রাণের অনল ।

আর একবার চিত্র করি দশন—
 বড়ই দুর্বল কিন্তু হতাশের মন ।

বিষম সংঘমে চিত্ত করিনু অটল,
 নিরখিলে যদি হয় আবার চঞ্চল !
 না হৃদয়—এ বাসনা কর বিসর্জন,
 কায নাই তুষানল করি উদ্দীপন ।
 পারি না যে—একবার—সুধু একবার !
 এই বার দেখি চিত্র দেখিব না আর ।
 নয়ন জন্মের মত কর দরশন,
 হৃদয় জন্মের মত কর আকিঞ্চন ।
 ছল্ভ রতন বলি ভাবিতে যাহারে,
 নিভূতে আলেখ্য তার ধর বক্ষে করে ।
 মিটাও মনের সাধ করিয়া চুম্বন,
 কাঁপ কেন ?—ভয় নাই, চিত্র অচেতন ।
 সিহরিল চিত্র !—না না আমারি হৃদয়,
 কাঁপিল আমারি ওষ্ঠ আলেখ্যের নয় ।
 আর না মিটিল সাধ, জন্মের মতন,
 চিত্রের সহিত আশা দিনু বিসর্জন ।
 চিত্র পট দন্ধ হ'ল, কিন্তু কই স্মৃতি গেল,
 প্রাণের ভিতরে দেখি সেই মূর্তি তার !
 এস কাল ! মুছে ফেল, কেন মিছে এ জঞ্জাল,
 এ ব্যাধির চিকিৎসক তুমিই আমার ।

নিশীথ বিলাপ।

১

অস্ত যাও নিশানাথ সূদূর অস্বরে
 অস্ত যাও তারাবন্দ—হাঁসিও না আর,
 ডেকোনা কোকিল আর স্তললিত স্বরে,
 খুলে ফেল চারু বেশ প্রকৃতি তোমার,
 আজ ভারতের ঘরে, সে আনন্দ নাহি নরে
 মরম বেদনা বুকে, মুখে হাহাকার
 অস্ত যাও জ্যোতিঃপুঞ্জ হ'ক অন্ধকার।

২

লুকাও সরসীকুল কুমুদ কমলে
 সারস মরাল দল লুকাও সত্বর,
 করোনা বিকাশ আর নব নব দলে,
 লুকাও মুকুলে পুনঃ প্রসূননিকর।
 সোহাগে ভাসায়ে কায় স্মরতি মলয় বায়
 এসো না ভারতে আর প্রণয়ের তরে,
 প্রেমের অন্ত্যেষ্টি আজ ভারত ভিতরে।

৩

উঠ উঠ হিমাচল ঘুমাও না আর,
 বারেক বদন তুলি কর নিরীক্ষণ,
 অনাথা ভারতমাতা চরণে তোমার,
 ভাসিছে শোকের নীরে যুগল নয়ন ।
 নাহি সে স্মারক বেশ, বিষাদে বিমুক্ত কেশ,
 মরম-বেদনে তাঁর কাতর জীবন,
 উঠ হিমাচল তাঁয় কর সম্ভাষণ ।

৫

সৈকত-শয়ন ত্যজি সলিল ঈশ্বরী,
 বারেক নেহার দীনা ভারত-জননী,
 স করুণ আর্তনাদে শূন্য ভেদ করি
 বিলাপেন রাজমাতা এবে অনাথিনী ।
 তোমার অতল কোলে, দুখিনীয়ে লহ তুলে,
 রাখ এ মিনতি মম রত্ন প্রসবিনি,
 ঘোষিবে এ কীর্তি তব পুরিয়া মেদিনী ।

৬

অয়ি শূন্যময়ী নীল অনন্ত-রূপিনি,
 অনাথা দুখিনী-দুখ দেখিছ কেমনে !

করিয়ে অনল যুষ্টি বজ্র প্রসবিনি,
 নিবাও অভাগি-দুখ কৃপা বিতরণে ;
 অথবা নিকটে আসি, লুকাও এ দুখরাশি ।
 তোমার স্নানীল ওই ঘন আবরণে,
 জননীর হেন বেশ অসহ্য নয়নে ।

স্বপ্ন প্রতিমা ।*

১

ভাঙ্গিল নিদ্রার ঘোর খুলিনু নয়ন
 এ ত সেই কক্ষ, কিন্তু কোথা সে স্বপন ।
 মুদিনু নয়ন পুন,
 যদি পাই দরশন,
 হা ! পোড়া কপাল নিদ্রা আসিল না আর !
 কোথা স্বপ্ন কোথা আমি সে প্রতিমা কার ।

* কোন স্নহদের অমুরোধে এই কবিতাটি লিখিত হয় ।

২

বিষাদে নিশ্বাস ত্যজি গবাক্ষ-সদনে
বসিনু কাতর মনে চাহিয়া গগনে ।

সুদূর গগন-কোলে

শশাক্ষ পড়েছে ঢলে,

বিদায়ের স্নান হাঁসি নিশির অধরে,
নিষ্প্রভ তারকা গুলি ডুবিছে অন্ধরে ।

৩

সহসা স্মৃতির দ্বার হইল মোচন,
আবার ভাসিল মনে সে সুখ স্বপন ।

চূর্ণ শশীরানি করে

রমণীর মূর্তি গড়ে

দেখাইয়া ছিল স্বপ্ন যেই প্রতিমায়,
দেখিনু মানস-নেত্রে গগনের গায় ।

৪

স্বধামাথা সেই হাঁসি ফুটন্ত অধরে,
সুটানা নয়নে মরি সেই দৃষ্টি ঝরে,

সেই নাশা সেই ভুরু

সে উরস সেই উরু ।

অবিকল সেই মূর্তি স্বপনে বাহারে
দেখিয়াছি মুগ্ধ নেত্রে, উন্মত্ত অন্তরে ।

৫

বিস্মিত নয়নে তারে হেরি বার বার
 চিনিতে নারিনু তবু সে প্রতিমা কার
 হাসিয়া অঙ্গুলি তুলি
 ঈষৎ উত্তরে হেলি
 প্রতিমা দেখায়ে দিল বিচিত্র কানন।
 পশিল শ্রবণ-মূলে “আছে কি স্মরণ।”

৬

“আছে কি স্মরণ?”—একি! অধিক বিস্ময়ে
 আদিষ্ট উদ্যান পানে দেখিলাম চেয়ে।

সকলি স্বপনময়
 প্রকৃতি ঘুমায়ে রয়,
 তরুরাজি-কোলে এক চারু সরোবর,
 মলিল হিল্লোল গুলি করে থর থর।

৭

সেই সরসীর ক্ষিপ্ত হিল্লোলের গায়,
 বালক বালিকা দুটি ধীরে ভেসে যায়,
 এক বৃন্তে বাঁধা যেন,
 দুইটি কমল হেন,
 পরস্পরে ধরি কর সন্তরণ করে,
 “চেন কি এ দুই মূর্তি?” শুনিবু অচিরে।

৮

চিনিব না কেন—হায় ! কিন্তু কেন আর
শৈশবের সেই চিত্র নয়নে আমার !

ওয়ে সেই সরোবর

সেই তরু মনোহর,

সেই তীর—সে সোপান, বাল্য-ক্রীড়া স্থল,
চির পরিচিত মম ওই সে হিল্লোল ।

৯

ওই মোরা ছুই জনে, হায় রে সে দিন !

এখনো তেমতি নব—হয়নি প্রবীন,

বাল্য আনন্দেতে হেঁসে,

হিল্লোলে চলেছি ভেসে,

ওই সেই শিশু আমি, শিশু-বিনোদিনী,
শৈশব-হৃদয়ে মম প্রফুল্ল নলিনী ।

১০

কোথায় সে দিন আজ ! কোথায় দুজন

কোথা শৈশবের সেই প্রিয় আকিঞ্চন !

কালের ভীষণ স্রোতে

ছুই জনে ছুই পথে

বৃত্ত-চ্যুত এখনো সে ক্ষত বক্ষঃস্থল ।

ডুবিয়া বিস্মৃতি-জলে হয়নি শীতল ।

১১

নয়ন পালটি দেখি সে উদ্যান নাই ।
 সে সরসী সেই ছবি আর কিছু নাই ।
 চূর্ণ তুলারাশি প্রায়
 শুভ্র জলদের গায়
 কুমার কুমারী দুই করে কর ধরে,
 দাঁড়ায়ে নিরবে—নেত্রে অশ্রুজল ঝরে ।

১২

কুমারীর বধূ বেশ সজ্জিত ভূষণে,
 কিশোর লাবণ্য ঢাকা কৌশিক বসনে,
 দুই জনে পরস্পরে,
 কাতর বদনে হেরে ।

অকস্মাৎ চারুচিত্র মিশিল গগনে ।
 “চেনকি এ দুই জনে ?” শুনিবু শ্রবণে ।

১৩

চিনিব না ! হায় মোর মর্মের ভিতরে
 আঁকা আছে ওই চিত্র চিরদিন তরে ।
 এই যে হতাশ মনে
 দাঁড়াইয়া দুইজনে ।
 দুজনার দুই প্রাণ ভাস্বিতে উদ্যত ।
 কেন কর নেত্রে আর এ চিত্র স্থাপিত ।

১৪

অকূল নৈরাশ্য-স্রোতে হতাশ অন্তরে,
ভাসায়ে দিয়েছি প্রাণ ওই করে ধরে,
হৃদয়ের গ্রন্থিচয়

একে একে সমুদয়—

ছিঁড়িয়াছি ওই দিন—হৃদয় আদিত্য
অস্ত গেছে ওই চিত্রে জনমের মত !

১৫

“এই বার দেখ চেয়ে” হৈল দৈববাণী,
অমনি ভাসিল নেত্রে সেই ছবিখানি ।

“শৈশবের প্রাণেশ্বর,

ছুখিনী বিনোদে ধর”

শূন্য হ’তে পদ-প্রান্তে পড়িল রমণী,
নহসি স্মৃতির স্বপ্ন ভাঙ্গিল অমনি ।

হিতকরী সভার সাংঘাতিক

সম্মিলন উপলক্ষে ।

মিলিত বঙ্গের স্মৃত দেশ-হিত সাধনে,
উজলিল সভাতল মরি বঙ্গ-রতনে !

সারঙ্গ গম্ভীরে বাজ, বাজ জোড়ে পাখয়াজ,
উচ্চ তারে তানপূরা গাহরে আমার মনে ।

তুমি ব পীষুষ ঢালি বঙ্গের স্বধীর গণে

ভাগ্যবতী তুমি উত্তর নগরি,

তাই এ রতনে দীপ্ত তব পুরী ।

জাহ্নবী গরভে ঢাকা ছিলে বনে,

এ সৌভাগ্য তব কে ভাবিত মনে ।

এ চারি সন্তান তব লভিলে কি শুভক্ষণে !

ভাতৃদ্বয় জয় বিজয় প্যারী বামাচরণে ।

পুত্ররাজকৃষ্ণ দয়ার জলধি,

বদান্য তাহার নাহিক অবধি ।

স্বধু তাই কেন প্রত্যেক সন্তানে

দেশ-হিতে রত অবিচল মনে,

হেন পুত্রগণ যার, ভাগ্যবতী সে নগরী,

ভূতলে অতুল ধান, জগতে সে স্বর্গপুরী ।

ভাতৃশ্রেষ্ঠ প্যারি কোথাহে এখন,

ফাটে বন্ধ তোরে করিয়ে স্মরণ !

বৎসরান্তে এই শুভ সম্মিলন,

ইথেও তোমার হবে না মিলন !

যেই হিতকরী-সভা সংস্থাপিলে যতনে,
মিলিতে নারিলে ভাই তারি শুভ মিলনে ।
স্বজিলে যে কীর্তিস্তম্ভ দেখিলে না নয়নে,
স্বধু ক্লেশ স্বধু শ্রম সহিলে হে জীবনে ।

কাঁদরে মৃদঙ্গ সুরুগ স্বরে,
কাঁদ পাখোয়াজ সে প্যারীর তরে,
কাঁদ তানপুরা কাঁদরে হারমিন্,
কাঁদ শিশু যুবা কাঁদরে প্রবীণ ।

তরুলতা পশুপক্ষী কাঁদমিলি সর্ব্বজনে,
কাঁদলো জাহুবি আজি উথলি আমার মনে ।
মুছি নেত্র-জল পুন দেখরে নয়ন তুলি,
ওইযে সোদরগণ রয়েছে সভা উজলি ।

বাজরে বাদিত্র আনন্দেতে পুন,
ডাক জগদীশে ডাক ঘন ঘন ।
ছিল ক্ষুদ্র পল্লী হয়েছে নগরী,
কিছু দিন পরে হবে স্বর্গপুরী ।

হারমিন পাখোয়াজ, বাজ মিলি উচ্চতানে,
দীর্ঘজীবী করি বিধি রাখুন এ ভাতৃগণে ।



পুষ্পমালা উপহার পাইয়া ।

১

বড় ভাগ্যবান্ আজ করিলে আমারে ।

এ কুসুম দাম মম পারিজাত হার,
রত্নের অধিক যত্নে রাখিব ইহারে,
আশার অধিক সখি তব উপহার ।

২

আপনি কুসুম রাশি করিয়া চয়ন,
গেঁতেছ এ পুষ্পহার শোভিতে বাহার,
কত ভাগ্যবান হায় আজ সেই জন,
কি বলিব সে কথা যে বলিবার নয় ।

৩

নশ্বর এ পুষ্পহার শুকাবে দুদিনে,
হৃদয় করিয়া শূন্য ভূতলে খসিবে,
এ স্থখের স্মৃতি কিন্তু জাগ্রতে স্বপনে,
চির দিন নিরন্তর হৃদয়ে জাগিবে ।

৪

প্রীতি উপহার কিন্তু কি দিব তোমায়,
কি দিয়া হইবে তৃপ্তি আছে কিবা ধন,

ঢালিয়া দিলাম সখি সমস্ত হৃদয়,
সঁপিছু তোমায় মম স্বাধীন জীবন ।

৫

তবু কি হইল—না না তবু তৃপ্ত নয়,
দাতার(ই) হয় জয় গ্রাহকের লাঞ্ছনা
উপহার তুচ্ছ—কিন্তু সেই যে হৃদয়,
সে বড় অমূল্য ধন কি তার তুলনা ।

৬

এ কুসুমদাম এত হ'ত কি সুন্দর,
যদি না হইত ইহা তব উপহার ?
গন্ধে আমোদিত এত হ'ত কি অন্তর,
যদি না থাকিত ইথে সৌরভ তোমার ?

৭

আশার জলধি ইহা স্মৃতির দর্পণ,
যত দেখি চিন্তিত তত হয় আমোদিত ।
নিভৃত চিন্তার ভাষা মনের নয়ন,
এ কুসুমদামে যেন সকলি নিহিত ।

৮

যা পেয়েছি পুষ্পহারে অমূল্য সে ধন,
অমূল্য সে দৃষ্টিসুধা, অমূল্য সে হাঁসি,

ততোধিক মূল্যবান সে অমূল্য মন,
ততোধিক স্খাধাপূর্ণ সে বচনরাশি ।

আমিত উন্মাদ নই, উন্মাদ জগৎ ।

১

দেখ না তুলিয়া আঁখি জগতের পানে,
কোথা মাদকতা নাই, কে নহে পাগল ।
গগণে ভূতলে জলে লতায় পাতায় ফলে,
তোমার মতন কার হৃদয় অচল ?
হৃদয় বিহীন হেন, জীব জন্তু আছে কোন ?
পাষণ হৃদয় শৈল তাহাও বিহ্বল,
উচ্চ শিরে চুম্বিতেছে নীল নভস্তল ।

২

কে নহে উন্মাদ দেখ সম্মুখে তোমার ?
চঞ্চল হৃদয়া ওই ভীম পারাবার,
তরঙ্গে তরঙ্গে কত, আলিঙ্গন অবিরত,
কত প্রেম কত স্নেহ তরঙ্গে উহার ।

কি স্থখে উন্মাদ সিদ্ধু তুমি বুঝিবেনা কিন্তু,
তরঙ্গে তরঙ্গে ওই চিত্ত বিনিময়,
বুঝিবে না ওই প্রেম কত সুধাময় ।

৩

বুঝিবে না তুমি কেন বিকচ কমল,
সরসী হৃদয়ে ভাসি করে টল মল ।
পরশি লিল্লোল কেন, উল্লাশে লুটায় হেন,
বুঝিবে না কেন এত হইয়া চঞ্চল,
উলটি পালটি চুষে সরসীর জল ।
নিরব সরসী জল নিরব জড় কমল,
পরশনে তবু মত্ত হৃদয় যুগল !

৪

কেন গগনের বক্ষে ওই সৌদামিনী,
নাচে ঘন ঘটা করি যেন উন্মাদিনী ।
নিলীম মেঘের গায়, কি স্থখে মিশায়ে রয়,
বিকাশে মধুর হাঁসি বিশ্ব-বিমোহিনী ।
দামিনী চাপিয়া বুকে মেঘ মস্ত্রে কত স্থখে,
বুঝিবে না এক অঙ্গে হলে পরিণত,
প্রেমিকের দুই চিত্তে উঠে স্থখ কত ।

৫

সেও প্রেম এত প্রেম গভীর উভয়,
 মাদকতা-শূন্য প্রেম গভীর কোথায় ?
 অন্তরে যে স্রোত বহে, ঢাকিলে কি চাপা রহে,
 যে খানে অনল দেখ পবন সেথায়,
 যে খানে প্রণয় সেথা পাগল হৃদয় ।
 দু'এক নরের চিত্ত, জড় পাদপের মত,
 কেবল প্রেমের স্রোত করিতেছে পান,
 তথাপি নাহিক হৃদে একটি তুফান ।
 উহাও ত প্রেম—সত্য উহাও প্রণয়,
 প্রবেশিয়া দেখ কিন্তু উহার হৃদয় ।
 অতলস্পর্শীয় প্রায়, একাণ্ড শূন্যতা তায়,
 আবর্তে আবর্তে প্রেম পশিছে অন্তরে,
 কচিৎ কখন যুহু হিল্লোল উপরে ।
 ডাকিয়া গোপনে তারে, বল সত্য কহিবারে
 প্রাণের ভিতর তার বুঝিবে কি করে ?

৭

নহে সে সংসারে সুখী—জীবন তাহার
 জ্ঞানের কণ্টকাকীর্ণ—সুধু যন্ত্রণার ।
 জীবনের মোহ জলে, পরিক্রান্ত দেহ ঢেলে—
 যুড়াতে হৃদয় শিক্ষা হয় নাই তার,

অধু উদ্দেশ্য সাধনে, জীবন কণ্টক-বনে,
শুষ্ক চিন্তে শূন্য বক্ষে করিছে ভ্রমণ,
উদ্বেলতা চিন্তে তার নাহিক কখন ।

৮

সে স্থখী কি আমি স্থখী ভাব একবার ।
পাগল আমার কিম্বা হৃদয় তাহার ।
অনুভূতি প্রাণহীন, হাঁসি কান্না দুই ক্ষীণ,
প্রবৃত্তি প্রবীণ—হেন হৃদয় যাহার,
কি স্থখ সংসারে আছে বুঝি না তাহার ।
শুষ্ক কণ্ঠে আজীবন মরুক্ষেত্রে পর্য্যটন,
অতৃপ্ত জীবনে শেষে বিয়োগ আত্মার ।

কুলীন কামিনী ।

(স্থান—নদীতীর ; সময়—সন্ধ্যা ।)

১

কি দুখে তটিনি ! তুমি হেন শুষ্ক বেশে
করুণ সঙ্গীত তুলি, শৈলময় দেশে ?
ললিত লহরী হায়,
বিষাদে মিশায়ে যায়,

সরস যৌবন মরি বিশুদ্ধ এমন
কোন্ দুখে বল নদি এতেক বেদন !

২

হার জানিতাম আমি অনন্ত সংসারে
একা অভাগিনী স্তম্ভ পাষাণে বিহরে,
শুদ্ধ স্তম্ভ এই প্রাণ,
গায় বিষাদের গাণ,
লুকায়ে মরম জ্বালা কাঁদি নিরঞ্জে ।
একা অনাথিনী আমি অখিল ভুবনে !

৩

তুমিও যে তটিনী রে আমারই মতন,
পাষাণে চাপিয়া বন্ধ কর সম্ভরণ,
নির্দয়ের পদতলে,
লুটাই নয়ন জলে,
নিষ্ঠুর গিরির পদে তুমি অভাগিনী !
লুটাইছ তরঙ্গিনি দিবস যামিনী ।

৪

এস সখি তুমি মম দুখের সঙ্গিনী,
এক দুখে দুই জনে সম অভাগিনী,

বসিয়া তোমার কূলে,
 প্রাণের কবাট খুলে,
 কাঁদিব তোমার সঙ্গে ভরিয়ে অন্তর,
 যতক্ষণ থাকি এই অবনী-উপর ।

৫

সখিরে বরষা এলে কিছুদিন তরে,
 আদরে তুলিয়া তোরে গিরি বক্ষে ধবে,
 কিন্তু সখি অনাথারে,
 মুহূর্তেক স্নেহ করে,
 নাহি হেন প্রাণী এক এ জগতীতলে,
 কে মুছাবে বল এই নয়নের জলে !

৬

সামান্য রমণী আমি অনন্ত সংসারে,
 কোন্‌ ছুখে কাঁদি সদা কে সন্ধান করে,
 মাংসভেদী তীব্র ছুখে,
 কি বেদনা বাজে বুকে,
 কে বুঝিবে বল নদি আছে কোন জন,
 বলিলে বুঝিতে পারে পরের বেদন ।

৭

সমাজের মুখে ছাই শ্রবণ-বিহীন,
 বিধির নয়ন নাই—হৃদয় কাঠিন ।

বল তবে কার পাশে
 যাইব স্নেহের আশে,
 হৃদয়-বিহীন নরে নাহিক বিশ্বাস,
 যুগতৃষ্ণিকায় কার সলিল প্রয়াস ?

৮

প্রান্তরে প্রান্তরে কিম্বা শশ্মানে শশ্মানে,
 শুষ্ক নদী তটে শুষ্ক লতার বিতানে,
 ফেলি নয়নের জল,
 হই কিছু স্নশীতল,
 নির্দয় মানব জাতী বুঝে কি কখন,
 কি অধার নিৰ্বরিণি রমণীর মন ?

৯

আবদ্ধ প্রেমের সিঁদু হৃদয় ভিতরে,
 উথলে নিরাশাকাশে মেঘখণ্ড হেরে,
 মুছিয়া নয়ন জল
 করি তায় স্নশীতল,
 বিষাদে তোমারি মত মিশায় লহরী,
 ভেসে যায় মেঘ থাকি দৃষ্টিরোধ করি ।

১০

কত দিন কত বার হৃদয়ের তার
 সহসা বাজিয়া উঠে, কিন্তু স্পর্শ কার

জানি না, নিবারি তারে
ভাসে বক্ষ নেত্রাসারে,
জ্বলে উঠে হৃদয়ের নির্ব্বাণ অনল,
ক্ষত মনে ক্ষত প্রাণে পুড়ি অবিরল ।

১১

এই পরিণাম হায়—সেই চির আশা !
অন্তরেই শুকাইল—সেই ভালবাসা !
কেন তবে জন্মিলাম

নাহি যদি লভিলাম
সুধাময় প্রণয়ের বিন্দু আশ্বাদন !
উদ্ধাহ বন্ধনে বাঁধি কেন বিড়ম্বন !

১২

নির্দয় প্রাণেশ কোথা এস এক বার,
দেখে যাও প্রণয়ের অন্ত্যেষ্টি আমার,
বালে—পরিণয়-কালে

যে সিন্দূর দিলে ভালে,
আজি নদী-জলে সেই সিন্দূর ভাসিল,
(গগুষে তুলিয়া জলে কপাল ধুইল) ।

১৩

খুলি লোহ “কড়” খুলি বাছর ভূষণ,
সধবার যত চিহ্ন করি উন্মোচন,

নিষ্কেপিয়া নদী-জলে,
 কহিলেক অশ্রু-জলে,
 “কোথা আছ প্রাণেশ্বর দেখ একবার,
 সধবার বৈধব্য হইল আবিষ্কার ।”

১৪

ডুবিল নদীর জলে স্বর্ণ ভূষণ,
 সিন্দূরের আভা ক্রমে হৈল অদর্শন,
 তটিনী তরঙ্গ তুলে,
 আঘাতি উভয় কূলে,
 চলিল গাহিয়া উচ্ছে “দেখ একবার
 সধবার বৈধব্য হইল আবিষ্কার ।”

১৫

তরুদলে পত্র কোলে নিখর পবন,
 হেরিল নদীর বক্ষে ডুবিল ভূষণ,
 কুসুম সৌরভ তুলি,
 গভীর সঙ্গীত তুলি,
 ছুটিল নদীর সঙ্গে গাহি অনিবার,
 “সধবার বৈধব্য হইল আবিষ্কার ।”

১৬

নির্মল গগনে মেঘ সহসা ছাইল,
 তটিনী ভূধর তরু আঁধারে ঢাকিল,

অনলের মত ফুটে,
বিদ্যুত চলিল ছুটে,
গস্তীরে গস্তীরে করি ভীষণ ঝঙ্কার,
“সধবার বৈধব্য হইল আবিষ্কার।”

১৭

ঢাকি মেঘ গরজন রমনী কহিল,
“জনমের মত দাসী বিদায় হইল,
কে আছ রমণী-কূলে
বাঁধা কোলিন্য শৃঙ্খলে,
এস এক সঙ্গে করি শৈকতে শয়ন,”
রমণা নদীর বক্ষে হইল পতন।



